

# Jonnyi **NYIKRWKAATAMNAM** **Mintamchonam**

*Jonnyi nyikrwkaatam namgo* Jisu kristonyi vd-  
wlo bunugv Ahtu bv vla mvngjwngla rinam lvga  
lo kristan nyi vdwa mvdwkmvkula riyilo hokach-  
ing lvktoku. Lvknv soogv dinchikochi nammv  
purinv vdwa mvngtin modubv okv mintvmiru  
dubv vla, okv hinchingchingla okv mvdwkmvku  
la riyilo mvngjwng lo vngdwng bv doodudakdubv  
vla lvkto.

Holvgabolo kitap soogv takloyangv  
nyikrwkaatamnam okv nyikrw gv vdwnv  
kaaringnam gaam am oogv alu lo kristan  
vdwgv lokv tvvchinto, vbvritola kvvbi mvnwng  
vdwgv lvgabv chinchi kaalin lamanam gobv  
rito. Mirimimpak lo gamlv gv lvkobv minam  
aingbv so kitap soogv gamlv nga angu angusinv  
lamtv lokv mindwmiying dvdvla nyikrw vdwgv  
lokv mindu. Kitap gv lvkwngbv tvvchin dubv  
minbwk jirilo mvngnam vv aku akusibv minjvka,  
soogv gamlv gv koolv jvngv si pwbwngvrwng  
sidunv: Ahtu Kristo gv lokv, Pwknvyarnv anyung  
jvngaku ninyigv ogumvnwng nyimak dvdv  
nga okv Uyudvbv aka mintak sila rigumriya  
nyami riku, okv vdwlo ninyigv ogumvnwng nga  
rigumriya la rinam am ringam rikudw ho ninyigv  
mvngjwngnv nyi vdwa anwnv sichingmooku okv  
nyidomooku nga bunua boktalwkji kunam am  
amin bv jireku.

**Arwng lokv darlinnam**

Mintamchonam (1:1-8)  
 Nyikrw kaatukake okv gvrja kanw lo siti lvk-  
 nam (1:9-3:22)  
 Tibungnam siti lo siel Kanw vdwv (4:1-8:1)  
 Tapu minam kanw (8:2-11:19)  
 Sichingpanv okv achiamin anyi (12:1-13:18)  
 Angu angusinv nyikrw (14:1-15:8)  
 Pwknvyarnv gv haachi chigvnnv talu  
 pwkkanw (16:1-21)  
 Bebilon gv yakkunam, okv svnwngsvmin gv  
 rigum yakunam, nyijwk mvnvrurv, okv  
 Uyudvbv (17:1-20:10)  
 Jwngkadakadw gv ataranya ngv (20:11-15)  
 Anwnv nyidomooku, anwnv sichingmooku, an-  
 wnv Jerusalem (21:1-22:5)  
 Anyunganya (22:6-21)

<sup>1</sup> Soogv kitap si Jisu Kristo gv kaatamnam am lv-  
 gap pvvto. Pwknvyarnv baapu alvbv ogugo rilin-  
 vnglin tvvdunv vdw sum kaatam nvvdu kubv vla  
 ninyigv pakbu am ninyigv soogv nyikrwkaatam-  
 nam sum jitoku. Kristo ninyigv nyidogindung  
 nga vngmunam lokv svkvnv ogu ogua ninyigv  
 pakbu Jonnyi chimuto, <sup>2</sup> okv Jon ninyigv kaanam  
 dvdv nga ogumvnwng nga minji toku. Soogv  
 mimpa jila rinam si Pwknvyarnv gv lokv okv Jisu  
 Kristo ninyigv jvfv nga kaatam kunam lokv jinan  
 doin gv lvkwng ngv. <sup>3</sup> Yvvdw soogv kitap sum  
 puridunv vv mvngpuv, okv yvvdw soogv nyijwk  
 doin gamchar sum tvvgap dunv okv ogugo soogv  
 kitap ara so lvkpvdw tvvnv vdwgv lvgabv vv  
 mvngpuv! ogulvgavbolo so mvnwng si rikunam  
 lvgabv dwv nvchi duku.

### *Gvrja kanw nga kumrwksinam*

<sup>4</sup> Asia gv mooku lo gvrja kanw am Jon lokv lvknam:

Pwknvyarnv, yvvla, yvvyila, okv yvvla aatv dukunv, okv ninyigv dvbvdootumnvvnv adarai gv Dow kanw gv lokv, <sup>5</sup> okv Jisu Kristo jwkjwkvrvk bv minjiriji kunv, sinam lokv atuake bv turkur kunv okv yvvdw nyiamooku gv dvbv dvdv ngaka rigvdogv kujinv gv lokv ayanamv okv sarsopoy-onamv nonu gvbvka.

Hv ngonua pakdu, okv vkvgv erinlwkjila sijikunam lokv ngonu rimur vdwlokv linpv kunv <sup>6</sup> okv karv gv nyibu gobv mvla kula ninyigv Pwknvyarnv okv Abu gv kudungkua nga ngonua rimu duku. Yunglit vla jwkrwv dvbvsingtam bv Jisu Kristo gvbv riyilaka! Amen.

<sup>7</sup> Kaatoka, Hv doomwk tolo gvngv aareku! Nyi dvdv ngv ninyia nyik daadw lokv kaapa reku, ninyia nvki nvngvka kaapareku. Siching soogv nyi mvnwng ngv ninyigv lvgabv kapreku. Vkvlv-gabv vbvching rirungre!

<sup>8</sup> Pwknvyarnv Kairungnv Ahtu, yvvla, yvvyila, okv yvvla aatv dukunv ngv hv mindu, “Ngo atuake ngv okv ataranya ngv.”

### *Kristo gv nyikrwgo*

<sup>9</sup> Ngo nonugv achiboru, Jon, okv Jisu gvlo riminggvnv gobv rikunam lvgabv ninyigv Karv gvbv rikunv vdwgvlo hindarkaso aanam am nonugv lvkobv ngo chitamrvnam mingvkunv. Ngo Jisu gv

---

**1:4** Mog 3:14; Nyikrw 4:5    **1:5** Aij 55:4; Miri 89:27    **1:6** Mog 19:6; Nyikrw 5:10    **1:7** Dan 7:13; Mt 24:30; Mk 13:26; Lk 21:27; 1Tes 4:17; Jek 12:10; Jn 19:34,37    **1:8** Nyikrw 22:13; Mog 3:14

kaatam nam jvjvnyv okv Pwknvyarnv gv gamchar am japgo jinam lvga lo nga Patmos gv bokpin golo vvpvtoku. <sup>10</sup> Ahtu gv alu lo ngam Dowv rigvdakgvto, okv ngo ngoogv kokwng peelvbv, adu dutvrungbv dunam vlvgo tvvpato, hv tapu minam gv adu aingbv duto. <sup>11</sup> Ho vlv ngv vbv minto, “No ogugo kaadudw lvkgap pvtoka, okv ho kitap am pamtv kanw gv gvrja: Epesias, Smairna, Pergamum, Tiatira, Sardis, Philadelphia, okv Laodisia lo jilwk tvlaka.”

<sup>12</sup> Ngo ngam mindunv yvvbvri vla kaakur kunamv, vbvrikunamv ngo ain mvdurupum tungpvnvnyv kanwgo kaato, <sup>13</sup> okv bunugv aralo nyi jvbv rinvggo kaato, okv vkvvgv vji v lvchu lo soochi nvgo okv ain hokpo go ninyigv haakwn-glo gvnv go. <sup>14</sup> Ninyigv dvmwv hultanu vmalo moodw tapam jvbv pungputojito, okv ninyigv nyikv vmv aingbv hungto; <sup>15</sup> Ninyigv lvpa ngv pitol am lvngka posok dubv pyaklapnam aingbv unglit toku, okv ninyigv vlv ngv isi dvngdo gv adudunam aingto. <sup>16</sup> Hv ninyigv lakbik peelvlo takar pwkkanwgo bvnvgto, okv ninyigv gaam lokv tagotaksak bv riukse ripujenv go lintoku. Ninyigv nyukmuv doonyi gv alu lopo lo ungnam aingbv ungtu. <sup>17</sup> Vdwlo ngo ninyia kaabvdw, ngo ninyigv lvchu kampwk lo sikunv nyi aingbv gipv toku. Hv ninyigv lakbik langv ngoogv aolo lakpv tvla minto, “Busu yoka!” Ngo atuake okv ataranya ngv. <sup>18</sup> Ngo turnv akinnv! Ngo sitoku, vbvritola vjak ngo dvbvsingtambv turbv duku. Sinam okv sinv

---

**1:13** Dan 7:13; 10:5    **1:14** Dan 7:9; 10:6    **1:15** Eje 1:24; 43:2

**1:17** Aij 44:6; 48:12; Nyikrw 2:8; 22:13

vdwgv mooku gv aolo ngo rigvdogv ladu kunv. <sup>19</sup> Vbvrikunamv, ogugo no kaapvdw, vjak ogugo ritvdonvdw, okv kokwng lo ogugo ritvdonvdw soogv baanyi am lvkgap pvvla ritoka. <sup>20</sup> Noogv ngam lakkik peelvlo takar Pwkkawgo bvngdubv kaanamv; okv ain mvdurupum tungpvnnv kanwgo bvngdubv kaanam si arwngjvnnv gobv ridu: takar pwkkaw mindunam si gvrja kanw gv nyidogindung vdwa mindunv, okv mvdurupum tungpvnnv kanwgo mindunam si gvrja kanw am mindunv.

## 2

### *Epesias lo doin jinam*

<sup>1</sup> “Epesias aralo gvrja gv nyidogindung nga lvkto:”

“Soogv doin si nyi ako ninyigv lakkik peelvlo takar pwkkawgo bvngnv okv ain mvdurupum tongpvnnv kanw lo vnggokarnv lokv doin si mindu.” <sup>2</sup> Ngo chindu nonu ogugo rito kubvdw; Nonuno vdwgo rai alvbv kudungkua rikubvdw okv nonuno vdwgo saktv kubvdw ngo chindu. Vdwgo alvmanv nyi vdwgv rinam lo saktv laku mabvdw ngo chindu okv apostol mabv vbvritola apostol gobv mvvla yvvdw minsu nama nonuno hingkwkakw sibvdw, okv bunu mvvdu kunyi vla okv hinchinla malin kunama ngo chindu. <sup>3</sup> Nonu saktvla rito, nonuno ngoogv lvkwnglo hirukaya nga hintoku, okv nonuno apakmato. <sup>4</sup> Vbvritola ngoogv nonua hakdunam si: Nonu kvvlo gv atuake lo apiabv vjak nga pakku madu. <sup>5</sup> Nonu vdwnv adu lokv holula ridu! nonugv rimur lokv mvngdw tvkuka okv atuake lo ouaingbv

ripvdw vbvching rito kuka. Nonu rimur vdwlokv mvngdw kuma bolo, ngo nonu gvlo aala okv nonugv mvdurupum tongpvnvngv nga dooku lokv am laala laa reku. <sup>6</sup>Vbvritola ngo vdwgo Nikolitan gv kudungkua rinam am hakdudw: nonuka vbv hakming gvnamv, si nonu mvngkiam namgo ridu.

<sup>7</sup> “Vbvrikunamv, nonu nyarung doodubolo, Dowv gvrja nga ogugo mindudw tvvtoka!

Yvvdw rigum yadudw um ngo Pwknvyarnv gv nayam lo singcha nvgv turnam singnv gv apwasi am pula dvdubv jire.

### *Smairna lo Doin jinam*

<sup>8</sup> “Smairna aralo gvrja gv nyidogindung nga lvkto:

“Soogv doin si atuake okv ataranya ngv, oogv sipikula okv turkur kunv gv lokv ngv”. <sup>9</sup> Ngo nonugv mvngdvrnvngso nga chindu; ngo nonugv heema nga chindu—vbvrijvka jvjvklvbv mimbolo nonu nyitvdu! Yvvdw jius bv rimatola jius gobv minsula rinv vdwv nonua alvmabv haklapala rinam am ngo chindu; Bunu vdwv Uyudvbv gvbv rinv atwng go! <sup>10</sup> Nonugv hindarkaso lvgabv oguguka nonuno busu yoka. Tvvtoka! Uyudvbv ngv nyigonv nonua hinkakaaka dubv patwk aralo tumlwk mola rire, okv vv alu looring gobv nonua hirukaya nga imure. Sinam gobv rijvka, nga mvngjwng namv vngdwngbv doobv laka, okv nonugv rigum yanam lvgabv ngo nonua turnam gv arv nga jire.

---

**2:7** Atk 2:9; Nyikrw 22:2; Eje 28:13; 31:8      **2:8** Aij 44:6; 48:12;  
Nyikrw 1:17; 22:13

11 “Vbvrikunamv, nonu nyarung doodubolo, Dowv gvrja vdwa ogugo mindudw tvvtoka!”

“Yvvdw rigum yadunv Lvnyinbv sinamv ogu rikumare.”

*Pergamum lo Doin jinam*

12 “Pergamum aralo gvrja gv nyidogindung nga lvkto:

“Soogv doin si riokse tagotaksak bv ripunv doonv vkv gvngv.” 13 Nonu ogolo doodudw ngo chindu, Uyudvbv ninyigv dootum doogingkolo doodu. Uyudvbv ho dootola, ngoogv doin min-jinv mvngjwngnv Antipas nyika, vdwlo mvkila ribvka, nonugv mvngjwng namv tupak mabv rito, okv nonu nga mvngjwng la ribvto. 14 Vbvritola ngo nonua achukgo mvngnyinghachi namgo doodu: nonugv pingkolo meegonv Balaam gv tamsar nama tvvla, oogv Balak gv Israel nyi vdwa murti lo erinlwknam adwn nga dvmu dubv okv yumoryoche minsu dubv rila tamsar nama tvvla rinv ngv doodu. 15 Oogv apiabv, Nikolitan gv tamsar nama tvvla rinv ngv nonugv pingko aralo ribamla ridu. 16 Vjak nonuno rimur lokv mvngdw tokulaka! Vbv nonu rimabolo, ngo nonu gvlo baapubv aagor reku okv ngoogv gaam sokv linv riukse lokv oogv nyi vdwa pami sireku.

17 “Vbvrikunamv, nonuno nyarung gvvdubolo, Dowv gvrja vdwa ogugo mindudw tvvtoka!

“Rigumyanv vdwa, dvnammanna nga jire. Laarkw sinv mvngchikv chimpa dubv yapungv

---

**2:11** Nyikrw 20:14; 21:8    **2:14** Num 22:5,7; 31:16; Det 23:4; Num 25:1-3    **2:17** Mog 16:14,15; 16:33,34; Jn 6:48-50; Aij 62:2; 65:15

vlwng lo anw bv amin lvknam umka ngo bunua mvnwng nga jire.

*Tiatira lo Doin jinam*

<sup>18</sup> “Taitira aralo gvrja gv nyidogindung nga lvkto:”

“Soogv doin si Pwknvyarnv gv Kuunyilo lokv gvngv, vkgv nyikv vmv jvbv bioknvg, okv vkgv lypa ngv brass pyaklapnam aingbv unglit la ridu.” <sup>19</sup> Nonuno ogugo ridudw ngo chindu. Ngo nonugv paknam, nonugv mvngjwngnam, nonugv kudungkua rinam, okv nonugv saktvsunam ngo chindu. Kvvlo gv ritu gv rinam um svnga vjvgv alvyabv kaiyabv ridung dunv umka ngo chindu.

<sup>20</sup> Vbvrivola ngoogv nonua mimbv svngv si: nyimvmvga Jejebel gv, ninyigv Pwknvyarnv gv yunying gvyanv akobv minsu nama um nonugv tvvmv yala doomu nama ngo nonua haachidu. Ninyigv tamsar sarmur nam lokv hv ngoogv pakbu vdwa yomurrimur minsu gvla okv murti lo erinlwknam am dvmur gvla risar gvvdv. <sup>21</sup> Ngo ninyigv rimur am mvngdw dubv dw am jito, vbvrijvka ninyigv alvmanv rimur kunam lokv hv mvngdw dukubv mvngmadu. <sup>22</sup> Okv vkvlgabv ngo ninyia gadw yupgingnvnv hoka orlwk reku okv ninyia okv ninyigv lvkobv yomurrimur minggnv vdwa achialvbv hirukaaya more. Bunu vdww vkvnv alvmanv rinamlo ninyigv lvkobv rinam am mvngdw maredw ngo vjak sum ribvdvdvre. <sup>23</sup> Ngo vkgv riminggnv aka mvkire, okv vbvrikubolo mvnwng gv mvngnam okv mvngchum nama chindunv ngo mwng vla gvrja dvdv ngv



chinreku. Okv nonu ogugo ribvdw oogv rinam lokv rijo nga ngo nonua lvkodv jireku.

<sup>24</sup> “Vbvritola nonugv taitira aralo doonv Kvggonv soogv alvmanv tasarnam sum tvvla riming gvmato;” nonu ‘Uyudv bv gv arwngrungbv vvsinam’ kvvbi go vnam am chiming gvla rimato. Ngo nonua mindunv ogu kvvbi vgego gvvmu kumareku. <sup>25</sup> Vbvritola ngo aama lo gobv, nonu gvlo ogugo doodudw, vngdwngbv gakbwngla dotolaka. <sup>26</sup> Yvvdw rigum ridw, yvvdw ritarrinya lo gobv ngo mvngnam am ridudw, ngoogv Abu gvlo laarwk sikunam tujupkunam am ngo nonua jireku: <sup>27</sup> Ngo bunua diringmooku nga rigvdubv tujupkunam am jire, bunua riokdwr lokv rigv nvmure okv takam pvchwng nga svmwk monam aingbv bunua svmwk more. <sup>28</sup> Ngo bunua aru gv karlumpumbum aka jire.

<sup>29</sup> “Vbvrikunamv nonu nyarung gvvdubolo, Dowv gvrja nga ogugo mindudw tvvtoka.”

### 3

#### *Sardis lo Doin jinam*

<sup>1</sup> “Sardis aralo gvrja gv nyidogindung nga lvkto:”

“Soogv doin si Pwknvyarnv gv Dow kanwgo doonv okv takar pwkkanwgo doogvnv agv lokv milwkdu.” Nonuno ogugo ridung dunvdw ngo chindu; Nonuno turdunv vla aminv doodu, vb-vrijvka nonu sidu! <sup>2</sup> Vkvlgabv nonu gvlo vjak sinyachika madvlo, gudung tokuka, okv gwlvk tvkuka. Vkvlgavbolo ngo kaanamv nonu ogugo

ridudw ngoogv Pwknvyarnv gv kaagia lo vjvka rvbwng madu. <sup>3</sup> Vbvrikunamv, nonua ogugo tamsar bvdw okv nonugv ogugo tvvbvdw um mvngpa tvlaka; sum tvvto la okv nonugv rimur dvdv lokv mvngdw tokuka. Nonuno uula doomabolo, ngo nonu gvlo dvcho nvgv aingbv aare, okv ngo aadw lo aareku nonu um chimare. <sup>4</sup> Vbvritola sardis aralo nonu pingkolo miang gonv vji am harkak sila rinv ngv doodu. Nonuno jipung vji nga gvtola, ngoogv vngkulo vngming gvvre, ogulvgavbolo nonu vbv ridubv rirungvgo. <sup>5</sup> Yvvdw rigum dunv um soogv vji yapungv koonam aingbv gvvmure, okv ngo bunugv amina turnam kitap lokv tilatia jimare. Ngoogv Abu gv kaagelo okv ninyigv nyidogindung vdwgv kaagelo ngo bunua ngo gvbv ridukunv vla ngo mingkuk jireku.

<sup>6</sup> “Vbvrikunamv, nonuno nyarung doodubolo Dowv gvrja vdwa ogugo mindudw tvvtoka!”

### *Philadelphia nga Doin jinam*

<sup>7</sup> “Philadelphia aralo gvrja gv nyidogindung nga lvkto:”

“Soogv doin si darwknv okv jvjvnnv akin go vkvgy lokv gvngv milwkdu”. Dabid gvbv rinv chabiv ninyi gvlo doodu, okv vdwlo hv riapgu nga chikuk bolo, yvka um kuktum lama dunv, okv vdwlo hv riapgu nga kuktum bolo um yvka chikuk lama dunv. <sup>8</sup> Nonuno ogu ridudw ngo chindu; nonu gvlo jwkrw meechinggo doodunv vla ngo chindunv; nonu ngoogv tamsar kobv vngming gvvdv okv ngam mvngjwng toku. Ngo

---

**3:3** Mt 24:43,44; Lk 12:39,40; Nyim 16:15    **3:5** Mog 32:32,33; Miri 69:28; Nyim 20:12; Mt 10:32; Lk 12:8    **3:7** Aij 22:22; Job 12:14

nonugv kaagia lo yvv gvka chiktum lamanam ri-  
apgu nga chikuk pvkunv.

<sup>9</sup> Tvvgap tvvlaka! Yvvdw jius mabv bunu  
jius gobv minsu dunv, vbv oogv mvvnvrnunv  
atwng ngv Uyudvbbv gvbbv ridunv, um ngo nonugv  
lvchu kampwk lo bunua guplwkla aadu bv mvre.  
Okv ngo nonua pakdunv vla bunu mvnwng ngv  
chinreku. <sup>10</sup> Ogulvgavbolo nonu ngoogv gamki  
nama saktvla doodu, ngooka sichingmooku sokv  
doonv nyi dvdv nga, hingkwkakw dubv nyi-  
amookulo adwkaku gv aarinyi nonua ringling  
lakula pvvching pvvmu riku. <sup>11</sup> Ngo baapu  
albbv aagoraayin rikunv. Nonu ogugo doodudw  
albbv richingrimu pvvlaka, vkvlgavbolo nonugv  
rigumla amin paapv nama yvka choka mare.  
<sup>12</sup> Yvvdw rigum doonv um ngoogv Pwknvyarnv  
gv Pwknvyarnvnaam lo ngo gwngnga pogobv  
mvre, okv hv vdwloka um kayu mare. Ngo  
ninyigv aolo Pwknvyarnv gv amin am okv ngoogv  
Pwknvyarnv gv pamtv, oogv nyidomooku gv  
ngoogv Pwknvyarnv lokv aanv anwnv Jerusalem  
gv amin nga lvklwkre, okv ngoogv anwnv amin  
aka ninyigv aolo lvklwkre.

<sup>13</sup> “Vbvrikunamv, nonuno nyarung doodubolo,  
dovv gvrja nga ogugo mindudw tvvtoka.”

### *Laodisia lo Doin jinam*

<sup>14</sup> Laodisia aralo gvrja gv nyidogindung nga  
lvkto:

---

**3:9** Aij 49:23; 60:14; Aij 43:4

**3:12** Nyim 21:2; Aij 62:2; 65:15

**3:14** Nyit 8:22

“Soogv doin si Amen lokv gvngv, vv jwkjwkvrv-  
wknv okv jvjvbw minjinv, Pwknvyarnv gv pwk-  
linyarlinnam dvdvgv lingku \* ngv. <sup>15</sup> Nonu ogugo  
ripvdw ngo chindu; Nonu harik laka rima vmalo  
hagu laka rimanam am ngo chindu. Nonuno  
akonyi vmalo akonyi rin v gubolo ngo alvdo  
mvngdu! <sup>16</sup> Vbvritola nonu guumgulum mvngdu,  
ogulvgavbolo hagu laka rima okv harik laka rima,  
vbvrinam lvgabv ngoogv gaam lokv ngo nonua  
tachur bv chura tvvdu kunv! <sup>17</sup> No mindu,  
‘Ngo nyitv dukunv, okv himpukain dukunv; ngo  
gvlo ngoogv mvngnamv doodunv vdu.’ Vbvritola  
nonu chinsu madu vdwo no gama nvgobv okv  
ayakaapa namgobv ridu! nonu heema nvgobv,  
abinbilin nvgobv, okv nyikching nvgobv ridu.  
<sup>18</sup> Vbvrikunamv, ngo nam minsar dunv, nyitv  
nam lvgabv ngo gvlo ain lo, kiakakmvrak jvnv  
ain lo rvvlaka. Vji jipung loka atubogv lvgabv  
rvvtoka okv hinyinghiru kaapanv awaro nga ko-  
mam sitoka. Nonugv nyik loka toolwk sinv dubv  
pyaknam loka rvvtoka, vbvribolo nonu alvbv  
kaapa lareku. <sup>19</sup> Yvnyyi ngo pakdudw um ngo  
mwnwng nga yamdunv okv mvrit dunv. Vb-  
vrikunamv, mvnggap rungtoka okv rimur lokv  
mvngdw tvkuka. <sup>20</sup> Tvvtola laka, riapgu si daktola  
okv takdwn dunv; yvvdw ngoogv vlv nga tvvchin  
dula chikuk redw, ngo bunugv duku naam lo aare  
okv bunua lvkobv dvming gvvre, okv bunuka  
ngoogv lvkobv dvming tvngming gvvre. <sup>21</sup> Ngoogv  
rigum lakula okv Abu gv dvbvdogingvnnv nvchilo  
dookunam aingbv yvvdw rigum lakula ridudw

---

\* **3:14** Lingku; Vmalo Pvbv rigvdogvnnv.      **3:19** Nyit 3:12; Heb  
12:6

um ngoogv dvbvdoogingnvnv gv dooku lo ngo doomu dubv jire.

<sup>22</sup> “Vbvrikunamv, nonuno nyarung doodubolo, dowv gvrja vdwa ogugo mindudw tvvtoka!”

## 4

### *Nyidomooku lo kumnamjonam*

<sup>1</sup> Soogv kokwng lo ngo kvvbi nyikrw godv kaato namv nyidomooku tologv riapgu ako chikuk dubv kaato.

Okv bikartapu minam aingbv vlvgo duunamv, nga kvvlo lokv mimbv dunbv ngo tvvto, okv minto, “soka chaatoka, okv soogv kokwnglo ogugo rirung tvvdunvdw ngo nam kaatamre.” <sup>2</sup> Vjakgovv dowv ngam laatung dato. Nyidomooku ao tolo dvbvdotumnvnv akolo nyi go dootung dubv kaapato. <sup>3</sup> Ninyigv nyukmu ngv yalwngbiok pato kula jaspas okv karnelian vlvng arv doonv yaji yalwng la kaapunv aingbv rito, okv vkvgv dotumnvnv agumailo rung emerald vlvng rong govv okritago akobv goyumto. <sup>4</sup> Oogv dvbvdoogingnvnv um kvvbi doogingnvnv chamnyi gola apigo dvvchardvyir pvvto, chamnyi gola api dotumnvnv hoka nyigagatv chamnyi gola api go ain biotung bintola okv yapungv vji vkv gvvtola doitsitungto. <sup>5</sup> Dvbvdoogingnvnv duku okvching dooriak riaklinla, okv doogum gv vdu vka gumlinto. Dvbvdoogingnvnv gv duku haabo peelv hoka vmv mvru pukkanwgo gudurto, oogv mvru kanwv Pwknvyarnv gv dow kanw nga mindu.

---

4:2 Eje 1:26-28; 10:1    4:5 Mog 19:16; Nyikrw 8:5; 11:19; 16:18; Eje 1:13; Nyikrw 1:4; Jek 4:2

6 Oogv Dvbvdoogingnvnv gv kaagia lo sisa gv svmasa jvbv kraistal vlvng kaar la kaanam nam ainggo dooto.

Dvbvdoogingnvnv oogv agumai hoka nangku okv haabo takbv turnv pwknamyarnam apigo nyik blvbv gvnv vkvvnv dookardovr gvvto. <sup>7</sup>Kaatukake angv abwngapa jvbv kaato; anyinvbv kaanamv svv vvpv ako jvbv kaato; aom nvbv kaanamv nyukmu angv vv nyi nyukmu jvbv kaato; okv api nvbv angv vv kiokum jarnv aingbv kaato. <sup>8</sup> Turnv pwknamyarnam apiv akin akinnv laap lapkv sakbv gvvto okv bunu gvlo nyik blvbv arwng loka okv agum loka takmum sila rito. Bunu vdwv alu lojvka ayu jvka vdwloka gaana gaangin mabv gaadu:

“Darwknv, Darwknv, Darwknv, Ahtuv Pwknvyarnv Kaiyachokv,  
Yvvyila, yvvla, okv yvvla aajinv.”

<sup>9</sup> Oogv dvbvdootumlo doonv, oogv dvbvsingtam bv doobwngnv um turnv Pwknamyarnam apiv ninyia junglitnam okv mvngdvnv am bonyikv vla mirimimpak gokla rito. Vdwlo bunu vbv ribvdw, <sup>10</sup> vbvrinamv chamnyi gula api nyigagatv ngv oogv dvbvdootumlo doonv gv kaagia hoka gimupto, okv oogv dvbvsingtam bv turbwngnv um kumlajola ritoku. Bunugv atubogv dvbvbiotung am dvbvdoogingnvnv gv kampwk hoka horpv tokula okv minto,

<sup>11</sup> “Ngonugv Pwknvyarnv Ahtu! no rung jwkrw, okv junglitnam, mvngdvnv, okv jwkrw turnam am paala rungnv ngv.

Holvgabolo no ogumvwnwg nga pwklinv nvngv,  
okv noogv mvngnam lokv bunua doobv sunv  
gobv okv turnam jito.”

## 5

### *Kitap tibungnam okv Svlarkuu*

<sup>1</sup> Dvbvdootumnvnnv lo doonv agv laktik peelvlo  
kitab tibungnam ako bvngdubv ngo kaato; vv tak-  
gotaksak bv lvkto okv siel kanw lokv tupto. <sup>2</sup> Okv  
ngo gwlvk rungnv nyidogingdung go kaato, vv  
vdu gamtv rungbv gokgo karla vbv minto, “Yvvla  
siel tubnam sum mvko nyola okv tibungnam ki-  
tap sum taakuk laka rila jinv ngv?” <sup>3</sup> Vbvritola  
nyidomooku hoka vmalo sichingmooku aoloka  
vmalo nyiamooku lvkwng bloka\* tibungnam ki-  
tap sum yvka taakuk la okv arwng nga kaala jinv  
kaamato. <sup>4</sup> Yvka ako daka tibungnam kitap sum  
taakukla okv arwng nga kaala jinvgo kaama nam  
lvgabv ngo yidwkmakula kapto. <sup>5</sup> Vbvrikunamv  
nyigagatvv lokv akonvnga minto, “No kapyoka.  
Kaatoka! Dabid gv kairungnv singsit, Juda gv  
haalung lokv paatv ako vv rigum toku, okv hv siel  
kanw nga mvyak lakula okv tibungnam kitap sum  
taakuk lareku.”

<sup>6</sup> Vbvrikunamv ngo Dvbvdotumnvnnv gv lv-  
paching lo Svlarkuu go dakdubv kaato, um turnv  
pwknamyarnam api ngv goyumto okv nyigagatv  
vdwka dakyumto. Svlarkuu angv lvko paki roku-  
nam gobv kaatoku. Vv rungbung kanw gvvnnv  
go okv nyik kanw gvvnnv go, vv Pwknvyarnv gv

---

**5:1** Eje 2:9,10; Aij 29:11    \* **5:3** Nyiamooku arwng loka: Siku gv  
nyiamooku    **5:5** Atk 49:9; Aij 11:1,10    **5:6** Aij 53:7; Jek 4:10

dow kanwgo, sichingmooku mvnwng lokv vngmu kunamv. <sup>7</sup> Svlarkuu ngv vnglaku okv dvbvdotumnv nv gv lakbik peelv gv doonv tibungnam kitap um laatoku. <sup>8</sup> Hv vbvrikunamv, turnv pwknam-yarnam api okv chamnyi gola api nyigagatv vdww Svlaraku agv kaagia lvpa kampwk lo guba lwkla kumtoku. Bunu gvlo nyichar ngv harp bajanv okv ain talu lo amuk nampunv vkvv bvngto, vbvrinamv Pwknvyarnv gv nyi vdwwg kumnam bv ridunv. <sup>9</sup> Bunu anwnv gaanago gaato:

“No tibungnam kitap am laalanv  
okv siel vdwa mvyakla mvkuk ladunv.

Ogulvgavbolo nam pakitoku, okv noogv siringla sijinam lokv no Pwknvyarnv lvgabv  
halung dvdvgv nyi vdwa, gaam dvdv nga,  
diringmooku, okv opi dvdv nga rvvlin toku.

<sup>10</sup> No bunu mvnwng nga nyibu gv karv gov ngonugv Pwknvyarnvnyi riji dubv mvtoku,  
okv bunu siching sum rigvre.”

<sup>11</sup> Lvkodv ngo kaato namv, okv nyidogindung atwnggo, hejar okv milion gov bunua ngo tvvpa toku! Bunu dvbvdotumnv lo doonv um, pwknamyarnam turnv api um okv nyigagatv vdwa, dakyum toku, <sup>12</sup> okv gamtv rungbv gaana vlv gokdubv tvvpa toku:

“Svlarkuu paki pvvnamv,  
jwkrw nga, nyitv nga, mvngkimvnglak, okv gvlwknam,  
mvngdvnam, yunglitnam okv hartvnam am paayin rungnv ngv.”



- 13 Okv nyidomooku, sichingmooku, nyiamooku gv arwng lo, okv svmasa gv arwng lo—pwknamyarnam dvdv nga chinggogologo—okv gaana gaadu bv bunu vdwgv vlv nga ngo tvvpato: “Dvbvdootumlo doonv ninyia okv Svlarkuu nga, hartvnamv okv mvngdvnamv, yunglitnamv okv gwlvk namv, dvbvsingtambv doobwng yilaka!”
- 14 Pwknamyarnam turnv apiv mirwkto, “Amen!” Okv nyigagatv vdvw lvbwng kumpv tvla okv Kum-tojotoku.

## 6

### *Tupnam siel vdww*

1 Vbvrkunamv ngo siel kanw lokv atuake anga Svlarkuuv mvyakla taakuk dubv kaato, okv turnv pwknamyarnam api lokv akonv vv vlv ngv doogum gumnam aingbv, “aalakv!” vdubv ngo tvvto. <sup>2</sup> Okv ngo kaanamv, yapungnv gora ako hoka kaapato. Vkvgv aolo doonv vv vrigo bvnngo, okv hv dvbvbiotung ako jikunam go. Rigum nvgv rigumnam aingbv hv rigum dubv vnglintoku.

<sup>3</sup> Vbvrkunamv Svlarkuuv anyinvnv siel um mvyakla taakukla rikunamv; okv anyi jinv gv turnv pwknamyarnamv “aalakv!” vdubv ngo tvvto. <sup>4</sup> Hokochingbv gora, lvngchingnv akodv linto. Hoggv gorajoknv um sichingmooku so yalungnyimak rimisumu dubv jwkrw jilwkto, vkvlgavbolo nyi am paki minsu modubv vla. Hv riukse sootv bogo jikunamv.

<sup>5</sup> Vbvrikunamv Svlarakuu angv vv siel aumnv um mvyakla taakukto; okv aomnv turnv pwknamyarnamv minto, “aalakv!” vdubv ngo tvvto. Ngo kaanamv, okv hoka yakenv gora ako dakto. Oogv gorajoknv vv ninyigv laklo kiikanvnnv vpipitak tago bvngto. <sup>6</sup> Turnv pwknamyarnamv api gv aralokv vlvgo adu dulin dunv aingbv tvvpato, vbv minto, alu lookin gv lvgabv rvklaplapjo ngv “Ampu gv nyilapdumtup akinnv, okv alu lookin gv lvgabv rvklaplapjo ngv radv gv nyilapdumtup aom ngv. Vbvritola olib singnv nga okv anggur rongo nga mvpak mabvka vto!”

<sup>7</sup> Vbvrikunamv Svlarakuuv siel apinv um mvyakla taakuk namv; okv ho turnv pwknamyarnamv apinnv vv minto, “Aatokv!” vla ngo tvvpato. <sup>8</sup> Ngo kaato namv, okv hoka ungmv unglvnnv gora go dakto. Ho gorajoknv gv aminv Sinam, okv sikunv vdwgv mookuv, Bunu vdwa sichingmooku gv aolo Api lokv akin gunyi tujupkunamv am jitoku, yalungnyimak lokv, yarwngdvrw lokv, lvvma lokv, okv mootum svnwngsvmin vdwlok mvkire.

<sup>9</sup> Vbvrikunamv siel angunvnnv um Svlarakuuv pukola taakukto. Yogwngmvrwng gv kampwk hoka Pwknvyarnv gv gamchar am japgo karnv vdwa okv jwkjwkvrvkbv minjiyanv vdwa mvki namgv yajiyalu vdwa doodubv ngo kaato. <sup>10</sup> Bunu vdwv adudutv rungbv gokto, “Gwlwkyachoknv Ahtu, darwknv, okv jvjvnnv! Sichingmooku lo nyi vdwa sum ngonua mvkinv vdwa jwngkadaka la okv mvrit dwv vdwching nyikula?” <sup>11</sup> Bunu

nyichar vdwa yapungnv vjipakria borsakgo jito, okv bunu vdwa pakinam aingbv kvvbi pakbu vd-waka okv mvngjwngnv vdwaka paki nyami ma lo gobv, bunua achukgo doonula doya chotoka vtoku.

<sup>12</sup> Okv siel akvnnv um Svlarquuv taakuk dubv ngo kaato. Hoka maatarrungbv mobi go hvkto, okv doonyi ngv vji kyaanv aingbv yakiato, okv poolu ngv lvngchingla oyi jvbv ritoku. <sup>13</sup> Takuk nyimanv asi gv ritvvdori riyinyi singnv lokv hol-unam aingbv takar ngv nyido lokv sichingmooku so ooluto. <sup>14</sup> Nyidokolo ngv tibungnam kitap aingbv tibung lakula nyeriku, okv moodw mvn-wng ngv okv bokpin mvnwng ngv aigv duku akin lo doomabv vngkupvngv riku. <sup>15</sup> Vbvrkunamv sichingmooku gv dvbv vdvw, rigvdogvnnv, okv militari abwngyachoknv, nyitv vdvw, okv jwkr-wyachonv, okv kvvbi nyi mvnwng vka, nyira vd-wka okv ajarabinv vvka, bunu awv hungrunglo okv moodw gv lvngrak arwnglo, toosi nyala rito. <sup>16</sup> Bunu moodw vdwa okv lvngrak vdwa goktoku, “Ngonua dvbvdootum lokv doonv gv nyukmu okv Svlarquu gv haachinam lokv toosinam lvgabv aolo homam bvka! <sup>17</sup> Bunugv maatarrungbv haachi chidvw silu kula, okv yvvka um dakrap minsu lama dunv?”

## 7

### *Israel gv nyi vdvw 144,000*

---

**6:12** Nyikrw 11:13; 16:18; Aij 13:10; Jol 2:10,31; 3:15; Mt 24:29; Mk 13:24,25; Lk 21:25    **6:13** Aij 34:4    **6:14** Nyikrw 16:20    **6:15** Aij 2:19,21    **6:16** Hos 10:8; Lk 23:30    **6:17** Jol 2:11; Mal 3:2

<sup>1</sup> Soogv kochingbv sichingmooku gv chenyung api lo nyidogindung api go ngo dakdubv kaapato, vv ritvdori api nga bvngto ogulvgavbolo sichingmooku so vmalo svmasalo vmalo singnv gunyika ritvdori ngv rilwk madubv vla daktumto. <sup>2</sup> Okv akonv nyidogindung gunv turnv Pwknvyarnv gv siel nga bvngtola doonyi chagia peelvbv aadu bv ngo kaato. Hv vlv gamtv rungbv gokla oogv siching sumla okv svmasa nga mvyakriyak nvdubv jikunam nyidogindung api nga goklinto. <sup>3</sup> Nyidogindung angv minto, “sichingmooku nga, svmasa nga, singnv vdwa, ngonugv Pwknvyarnv gv pakbu vdwa ngonu siel go bunugv tuktumlo mvu ma dvdvlo gobv bunua mvtvmvrv mabvka.” <sup>4</sup> Okv Oogv bunugv tuktumlo Pwknvyarnv gv siel lokv mvu namv 144,000 go vla nga minjito. Bunu vdvw Israel gv halung vring gula anyi lokv gvngvto, <sup>5-8</sup> Heejar vring gula anyigo halung gv nyiki lokv ngv: Vv Juda, Reuben, Gad, Asher, Naphtali, Manasseh, Simeon, Lebi, Issachar, Zebulun, Josep, okv Benjamin lokv ngv.

*Jipung vji konv nyitwngtwngtv*

<sup>9</sup> So koching bv ngo kaato namv, okv hoka kiila kumanam nyitwnggo dooto—oogv nyi mvnwng nga yvvka kila nyuma nvgobv rito! Bunu vdvw vpinvpin lokv halung lokv, diringmooku lokv, okv angu angusibv gaam minv vkvnv lokv dvbvdootumlo doonv okv Svlarkuu vkgv kaagia lo bunu yapungnv laklwk kotola okv bunugv laaklo tali linv vkvnv bvngtola hoka dakyiriging pvnyato. <sup>10</sup> Bunu gamtv rungbv gokla vbv minto:

“Ringlinbaalin namv Svlarkuu gv lokv okv oogv dvbvdootumlo doonv, ngonugv Pwknvyarnv gv lokv aadunv!” <sup>11</sup> Nyidogindung mvnwng ngv dvbv dotumnvnnv ngam, nyigagatv vdwa, okv turnv pwknamyarnam api nga dakyum dakchito, Vbvrikunamv bunu atubongv dvbvdotumnvnnv gv kaagia lo nyukmu ngv choobup tvla okv Pwknvyarnv nga kumlajola, <sup>12</sup> vbv minto, “Amen! Hartvnamv, younglit namv, mvngkimvnglak namv, umbonyikv vnamv, mvngdvnammv, jwkrw ngv, okv gwlvk vv ngonugv Pwknvyarnv gvngv! Amen!”

<sup>13</sup> Nyigagatv akonvnga tvvkato, “Oogv vji laklvk yapungv gvnv nyi vdwsii yvv bunula, okv ogolokv aadu nvdw?”

<sup>14</sup> “Ngo chima laka, nyigam bonyi. No yadv china dunvpv,” ngo vbv mirwksito.

Hv nga minto, “Soogv nyi vdwsii oogv mvngjwngnam lokv mvdwmvku kunama ringlin sulakula linkunv vdwv. Bunu vdwv bunugv vji laklvk am yapung dubv Svlarkuu oyi lokv harkakla pungpu mootoku. <sup>15</sup> Vkvlgabv bunu Pwknvyarnv gv dotumnvnnv agumai lo daktola okv ninyigv Pwknvyarnvnaam lo alu ayubv ninyia kudungkua rijila ridu. Yvvdw dvbvdotum lo doodunv hv ninyigv dookulo bunua chigudabiala riya jire. <sup>16</sup> Vdwloka bunu lvkodv kano nam okv isi tvngnwng kumare; vmalo Doonyi vmajeka ogu hagu gunvgoka bunua guka mare, <sup>17</sup> vkvlgavbolo Svlarkuu,

---

**7:14** Dan 12:1; Mt 24:21; Mk 13:19    **7:16** Aij 49:10    **7:17** Miri 23:1; Eje 34:23; Miri 23:2; Aij 49:10; Aij 25:8

oogv dɔvɔdotungv aralvpalo doonv, vɔ bunugv svlarkaya nɔvɔ rire, okv Hv bunua turnam jinv isi sigung lo opchum riayila vnglwɔk gɔvre. Okv bunugv nyiklo nyiksinyikla mɔvɔwng nga Pwɔkɔvɔyarnv tikak jireku.”

## 8

### *Siel kanwɔv*

<sup>1</sup> Vɔwlo Svlarɔkuuv siel kanwɔv um taakuk bɔdɔw, nyidomooku tolo ada gunta gobv jimijima toku. <sup>2</sup> Vɔvrikunamv oogv Pwɔkɔvɔyarnv gv nɔvɔhilo nyidogindung kanwɔgɔ dakdubv ngo kaato, okv bunua tapu minvɔvɔvɔv kanwɔgɔ jito.

<sup>3</sup> Nyidogindung akonv, nampunv ramvɔvɔvɔv ain takbɔv go bɔvngtola, aato okv yogwngmɔvɔvɔv hoka dakto. Dɔvɔdotumvɔvɔv agumai lo namnɔvɔvɔv ramvɔvɔvɔv ain takbɔv lo Pwɔkɔvɔyarnv gv nyi vɔwgv kumnam ma vɔwgo amuk namnɔvɔv am lwkta dɔvɔdubv ninyia jito.

<sup>4</sup> Pwɔkɔvɔyarnv gv nɔvɔhilo dakv nyidogindung vɔwgv laak lokv Pwɔkɔvɔyarnv gv nyi vɔwgv kumnam lvkɔbɔv namnɔvɔvɔv ramnam ngv mɔvkwɔv naung ngv unghadu. <sup>5</sup> Vɔvrikunamv nyidogindung ngv namnɔvɔvɔv takbɔv nga laatoku, yogwngmɔvɔvɔv lokv vɔv go mɔvkwto, okv sichingmooku svka orlwkto. Hoka doogum ngv gumsin gumyin la rito, dooriak ngv riakla, mobiv hvkla ritoku.

### *Tapu minvɔvɔvɔv vɔwv*

<sup>6</sup> Vɔvrinamv nyidogindung kanw ngv tapu kanw nga minvɔvɔv vɔv bunu ritoku.

---

**8:3** Amo 9:1; Mog 30:1,3  
Nyikrw 11:19; 16:18

**8:5** Leb 16:12; Eje 10:2; Mog 19:16;

<sup>7</sup> Atukchuchok gv nyidogindung angv ninyigv tapu nga mitoku. Tvv okv vmv ngv, oyi ayoachik tvla aala, sichingmooku lo pwlwk loto. Sichingmooku taaum lokv taagonyi, singnv apum gv paaum lokv pamgonyi vmvbv gula gua nyami toku, okv nwsinnwji gv jiiipapi baak aom lokv baago nyika gupak nyami toku.

<sup>8</sup> Hokoching bv anyi nvnv nyidogindung angv vv ninyigv tapu nga milinto. Ho moodw jvbv kaaring nvgo vmv mvdur gunv go svmasa gv silolvpa bv holwtko. Svmasa gv tagum lokv tagonv oyi bv ritoku, <sup>9</sup> sinv svmasa aralo doonv turnv pwknam-yarnam lokv akonyi simuto okv svpw aom lokv akonyi amwk toku.

<sup>10</sup> Hokochingbv aumnvnv nyidogindung ngv ninyigv tapu nga milinto. Ho dootvtakar kartv bogo, mvru pugo gudunv jvbv nyidokolo gv ngv, sikogv koum nvnv lokv koogonyi okv sichaksinyak aom nvnv lokv akonv ho holwtko.

<sup>11</sup> (Takar aminv vnam si “kvvchaknv”) isi gv aomnv lokv akonv kvvchakto, okv vdownv nyi vv oogv isi am tvngtola sito, ogulvgavbolo vv kvchakkunv gobv rito.

<sup>12</sup> Okv apinvnv nyidogindung angv ninyigv tapu nga milinto. Ho doonyi gv nyukmu akina aom gobv mvnam lokv akonv, okv poolu akin am mvnam lokv aum gobv mvpin sinam lokv akonv okv takar dvdvgv aom gobv mvnam aom lokv pamgonv tuptur sito, vkvlgavbolo bunugv loung unggvnvnv aom lokv akonv nyetoku; alu gv loung

---

**8:7** Mog 9:23-25; Eje 38:22

**8:10** Aij 14:12

**8:11** Jer 9:15

**8:12** Aij 13:10; Eje 32:7; Jol 2:10,31; 3:15

baom lokv baagonv nyetoku. Okv ayu gv loung baom lokv baagonv nyetoku.

<sup>13</sup> Vbvrikunamv ngo kiokum nvgo ao tolo jarkar dubv kaato, okv gamtv rungbv vdugo dula vbv mindubv ngo tvvto, “Busu vdanv! Busu vdanv! vdwnyi nyidogindung aom gonv gv tapu nga migv ridw, sichingmooku sokv nyi rin v mvnwng gv lvgabv si vdwgo busukano namgobv ridunv!”

## 9

<sup>1</sup> Vbvrikunamv nyidogindung angunv v v ninyigv tapu nga milinto. Ho ngo takar nga sichingmooku lo olu kunam am kaato, okv ho dootarkamanv ungrung\* gv chabi nga jilwkto.

<sup>2</sup> Takar angv v v dootarkamanv ungrung nga ikukto, okv kairungnv vmv mvriak lokv mvkw sukchanam aingbv, mvkw ngv soksok pabv soklinto; Doonyi loung okv doori ngv dootarkamanv lokv mvkw sokchanv kanv ngv dwk pato. <sup>3</sup> Takam vdw sum mvkw lokv sichingmooku so limu toku, okv modwdwkong gv jwkrw sum karing sibv bunua vdwaka jwkrw aka vbvching jidu kalumto.

<sup>4</sup> Bunua vbv minto singnvsingu sum vmalo singnv vdwa vmalo kvvbi nvsinnvmwng vdwaka oguguka twkma dubv minto; vbvritola yvvdw bunugv tuktumlo Pwknvyarnv gv siel lokv tupnam kaama pvdw vkvnv nyi mvngchik ka bunua chetwkkvrwk dubv tulwkto. <sup>5</sup> Takamkamar vdw

<sup>4</sup> Bunua vbv minto singnvsingu sum vmalo singnv vdwa vmalo kvvbi nvsinnvmwng vdwaka oguguka twkma dubv minto; vbvritola yvvdw bunugv tuktumlo Pwknvyarnv gv siel lokv tupnam kaama pvdw vkvnv nyi mvngchik ka bunua chetwkkvrwk dubv tulwkto. <sup>5</sup> Takamkamar vdw

---

\* **9:1** Dootarkamanv ungrung (Bottomless) kvdw ungrung vram vdwa bunugv mvritmvmmit dw ngv aama dvdvlo gobv patwk tumpvku oyu mooku ngv. **9:2** Atk 19:28 **9:3** Mog 10:12-15

**9:4** Eje 9:4



sum oogv nyi vdwa mvki dubv jimato, vbvritola poolu pwkngu gv lvgabv bunua mvdwkmvku rungubv tulwk jito. Oogv mvdwkmvku la achinamv modwdwkong gv cheetwk tvla achinam aingbv rimuto. <sup>6</sup> Oogv poolu pwngu lo bunu sinam lvgabv mare, vbvritola bunu paamare; bunu vdww sinwngre, vbvrijvka sinamv bunua kiyure.

<sup>7</sup> Takam vdww kaanamv nyimak vngtvnv gora aingbv ridung nyadu. Bunugv dumpo lo bunu vdww ain biotung bimpvvnv jvbv kaato, okv bunugv nyukmu ngv nyi aingbv ridu. <sup>8</sup> Bunugv dvmw ngv nyimv vdwgv dvmw jvbv rito, bunugv hijung ngv abwngapa gv hijung jvbv rito. <sup>9</sup> Bunugv hakwng lo riokdvr saruk aingbv kaanv vkvvnv hokto, okv bunugv lap lokv lapdwn la vdu dunv ngv goragari atwng go nyimak lo jokdunv jvbv tvvto. <sup>10</sup> Bunu vdwgv nyabung gvvnamv, okv dwkong gv nyabung gv lvtak jvbv ridu, okv bunugv nyabung ngv vkvvnv jwkrw ngv doodu nyi vdwa hirukaya modubv poolu pwkngu lo gobv nvkwng more. <sup>11</sup> Bunu gvlo ka bunua rigv jinv dvbv go doodu, vv dootarkamanv ungrung nga kaayatayanv nyidogindung ngv. Vkvgv amina Hebrew lo Abaddon gobv mindu; Okv Greek lo Apollyon gobv amin am mindu (vbv mindunam v “Mvyakriyakanv” ngv vdu).

<sup>12</sup> Soogv busu sucho jinamv vngroku; soogv kokwngbv um busu yaya dubv rimu jinv ngv anyigo aare.

13 Akvny nyidogindung angv vv ninyigv tapu nga mito. Ho Pwknvyarnv gv dooku agumai gv doonv namwnama ramnvny ain takbvr gv chenyung api lokv gaam vdugo aadu bv ngo tvvpato. 14 Vdu ngv nyidogindung akv nga minto, “Kairungnv Euphrarates siko lo, nyidogindung api go kintung pvvnama tulin jito kuka!” 15 Nyidogindung api nga tulin jitoku; ogulvgavbolo hogv anying chinglo hogv poolu chinglo hogv aluchinglo hogv dw chinglo bunu nyi mvnwng nga apum aom gov mvnam lokv apum gonvnyi mvki dukubv mvpv ripvla vvpvtoku. 16 Ngo gorajoknv sipai vdwa kiitokula mintam jitoku: Vv lvngnyi milion gov ritoku 17 Ngo nyikrw kaakulo gora achialvgo kaato okv vkv aolo bunugv oogv doonv nyi aka kaato: bunu vmv mvru jvbv kaanv lvngchingnv saruk go kooto, yabubulu tvla sapire vlvng ainggo, okv yage tvla salpar amwk ainggo. Gora gv dumpo ngv abwngapa vdwgv dumpo jvbv rito, okv bunugv gaam lokv vmv ngv soksook lindu. Mvkw ngv soksook lindu okv salpar amwk vkvny linto. 18 Nyiamooku sokv nyi nyitwng aom lokv akonyi: bunu napa lokv linv vmv, mvkw, okv salpar amwk vkvny aomgo linv vkvny lokv, chilichilam aingbv mvki nyami toku. 19 Ogulvgavbolo gora gv jwkrw ngv bunugv napa lola okv nyabung lo doodu. Bunugv nyabung ngv tabw gv dumpo aingbv ridu, okv bunu um mvnvrinv la nyi vdwa achialvby achi dubv mvdu.

20 Oogv chilichinam lokv, yvvdw nyia opi

simabv doobvla ribvdw oogv doonv dvdv  
 ngv, bunu atubogv vkvnv mvsv risunam lokv  
 mvngdinla lingku mato. Bunu uyuvram am  
 kumnam um kayu mabv kumbv la ridu, vmajvka  
 ain lokv, Raaji lokv, tamba lokv, vlvng lokv,  
 okv vsing lokv, mvnam morti oogv nyik kaala  
 manv nyarung tvvla manv, vmajvka vngla manv  
 vkv nvnga kumbvla ridu. <sup>21</sup> Vbvmajvka bunu  
 mvkipaki minsunam lokv, bunugv lamahinv  
 lokv, bunugv yomurminsunam, vmalo bunugv  
 choonam lokv bunu mvngdin kumaduku.

## 10

*Nyidogindung okv tibungnam kitap dapching  
 ngv*

<sup>1</sup> Vbvrikunamv ngo kvvbi kairungnv nyidogin-  
 dung akodv nyido ao lokv hila aadung dubv  
 kaato. Ninyia doomwkgo goyum dubv okv  
 ninyigv dumbo lo okritago ngv goyumto; ninyigv  
 nyukmu ngv doonyi gv jbv rito, okv ninyigv  
 lvpa ngv vmv biokdung chala lvngtung aingbv  
 rito. <sup>2</sup> Vkvvgv laaklo t tibungnam kitap taakuknam  
 dapchinggo dooto. Hv svmasa gv aolo ninyigv  
 lvpa lvvbik ngv lvpvto okv ninyigv lvpa lvvchi  
 ngv sichingmooku lo lvpvto, <sup>3</sup> okv gamtv rungbv  
 abwngapa gv haa ha la haanam jbv vdu vlv  
 ngv huklinto. Vbv hvkvvgv huklin ronam kokwng  
 bv, doogum kanwgo gumrwk sila minto <sup>4</sup> Bunu  
 doogum bv gumrwk sila mirwk siro kokwngbv,  
 ho ngo lvknvvp mvngla lvktvto. Vbvrinamv nyido  
 tolo gvngv vlvgo gaam minamgo ngo tvvpatu,  
 “doogum kanw ngv ogugo mimbdw sum an-  
 gusibv vvsila vvching pvvtoka; lvkpvla riyoka!”

<sup>5</sup> Vbvrikunamv ngoogv svmasa gv ao lola okv kvdw dwpw gv ao lo dakdubv kaanam nyidogindung angv vv ninyigv lakbik nga nyidokolo bv hidung dubv ngo kaato <sup>6</sup> okv oogv dvbvsingtam turnv Pwknvyarnv, nyidomooku nga, sichingmooku nga, okv svmasa nga, okv ogumvwnwng nga pwklynarlinnv Pwknvyarnv gv amin lo bunua nyidogindung ngv milv jila vbv minto, “Vjak tapv kumare! <sup>7</sup> Vbvritola vdwlo nyidogindung kanwnv angv ninyigv tapu nga miredw, vbvrikubolo ho Pwknvyarnv ninyigv pakbu bv rinv nyijwk vdwa oguaingbv mimpa jicho mopvdw hogv pvvchingnam um ripwngrinya jireku.”

<sup>8</sup> Vbvrikunamv oogv gaam mindunv vbv lvkodv nyidomooku lokv nga mindv dubv ngo tvvpa dvto, vbv minto, “Svmasa gvla okv sichingmooku gv aolo daknv nyidogindung gv laaklo tibungnam kitap um taakukla rinam um vngyila okv laatoka vto.”

<sup>9</sup> Vbvrikunamv ngo nyidogindung gvlo vngla okv miangnv tibungnam kitap am nga jila bvkv vla ngo ninyia kooto. Hv nga minto, “sum lala okv dvtoka; si noogv leitlo kungsukre, vbvrijvka noogv napalo si tangutii jvbv chiipure.”

<sup>10</sup> Ngo ninyigv laak lokv tibungnam kitap dapching am laala okv um dvtoku, okv vv dvkw namv ngoogv napalo tangutii jvbv tipula ritoku. Vbvritola ngoogv dvmitla rironam kókwnglo, vv ngoogv leitlo kungsok toku. <sup>11</sup> Vbvrikunamv nga mintoku, “no Pwknvyarnv gv doin am diringmooku lo, opi mvnwnwnglo, nvgwng gv gaam

minv dvdvlo, okv dvbv vdwgvlo lvkodv japgo karji tvka vtoku.”

## 11

### *Tvvyakayanv anyi*

<sup>1</sup> Vbvrikunamv ngam kiinvnvnv vpi jvbv kaanv singkio songa ainggo jitola, okv vbv minto, “vngyilaka okv Pwknvyarnv gv Pwknvyarnvnaama, okv oogv Pwknvyarnvnaam arwng gv erinpeeing lwknvnv um kiika tvka vto. Okv Pwknvyarnvnaam lo kumnvjonv vdwa kiito laka. <sup>2</sup> Vbvritola agum gv dookum kongv um kiika mabvka, ogulvgavbolo Pwknvyarnvnyi chimanv vdwgv lvgabv jitoku, vv bunu Pwknvyarnv gv darwknv pamtv nga poolu champi gula pwknyi go samtin samlin reku. <sup>3</sup> Ngo kaayatvyanv anyigo tagiam laklwk koomu tvla aamure, okv bunua Pwknvyarnv gv doina alu 1,260 gov japgo karmure.”

<sup>4</sup> Tvvyakayanv anyiv olib singnv nvnvnyi vv okv sichingmooku nga Ahtu nvgv kaagelo dagv jinv vv mvdurupum pwknyi ngv. <sup>5</sup> Yvv nyigonv ninyia mvtmvrw ridw, vmv ngv ninyigv gaam lokv linre okv bunugv nyimak vdwa gukire; okv vbvnila yvvdw bunyia mvtmvrw dubv gwngdudw umka gukire. <sup>6</sup> Bunu anyi gv Pwknvyarnv gv doina japgo kardwnyi nyido homa dubv nyidokolo nga mvtum nvnv tujupkunam am bunu anyi gvlo doodu. Isi gv sirung aka, bunu gvlo oyi gov rila dubv mvla gvnvnvnv tujupkunamv doodu; Bunyi anyi ngv vdwgo mvngdudw vbv sichingmooku so

---

**11:1** Eje 40:3; Jek 2:1,2

**11:2** Lk 21:24

**11:4** Jek 4:3,11-14

**11:6** 1Dv 17:1; Mog 7:17-19; 1Sam 4:8

chilichilam nvgwng aka rimu ladubv rila gvnvnv tujupkunamv doodu.

<sup>7</sup> Vdwlo bunugv doin am mingam rikudw, dootarkamanv ungrung lokv svnwng ngv bunua nyimak rimisire. Hv bunua mvoja yariku okv bunua paki riku, <sup>8</sup> okv bunugv svma ngv kairungnv pamtv gv lamtv lvpalo, bunugv Ahtu am ogolo kili takla mvki lwkpvdw hokaching dooreku. Oogv pamtv kainv um aminv miring sinvlaku sidom vmalo Ijpt gobv mindu. <sup>9</sup> Diringmooku mvnwng ngv, halung mvnwng ngv, nvgwng gaambv minv dvdv ngv, okv opi dvdv ngv, bunugv svma nga rimu kumabv mintur tvla, okv alu loum gula okv lopo patung gobv kaakwng la rire. <sup>10</sup> Bunyi anyi gv sinam lokv sichingmooku soogv nyi mvnwng ngv mvngpu pumin yare. Bunu harjuk jukminla nyi vdwv amin jimi sinyala rire, ogulvgavbolo nyijwk anyiv mvnwng gv nyia halung dvdv nga mvngdwk mvngku paamuto. <sup>11</sup> Alu loum gula okv lopo patung gv kokwng loku turnama jinv saknamv Pwknvyarnv gv lokv aato okv bunu gvlo aalwk toku, okv bunu dakrap nyato; okv bunu mvnwng ngv yvvdw bunua kaabvdw vv bunu busu nyatoku. <sup>12</sup> Vbvrikunamv nyijwk anyi gonv nyido tolo gvngv bunua gamtv rungngv go, “soka chaato kuka!” vdubv tvvpatoku. Bunugv nyimak vdwa dakpv tvla kaaya dadubv, bunu nyidokolo bv doomwk arwngbv chaalwk toku. <sup>13</sup> Hogv vbv riyilo moobigo hvktv alv rungngv hvktoku; Pamtv

---

**11:7** Dan 7:7; Nyikrw 13:5-7; 17:8; Dan 7:21      **11:8** Aij 1:9,10

**11:11** Eje 37:10      **11:12** 2Dv 2:11      **11:13** Nyikrw 6:12; 16:18

akina vring gobv mvnam lokv akonyi amwkamak nyami toku, okv hajar kanw nyi gonyi mvki nyami toku. Turnv dvdv ngv busula lamngak palaku okv nyidomooku aogv Pwknvyarnv gv kainama hartvbamtv la ritoku.

<sup>14</sup> Busunamv anyi gonv vngroku, vbvritola lvum nvbv busunamv ayongjvmbv aadvre!

*Kanwnvny minam tapu*

<sup>15</sup> Vbvrikunamv kanwnv nyidogindung angv vv ninyigv tapu nga milinto. Okv vbvrinamv um nyidomooku tolo gvngv adu duutvrungnv go dulin la, vbv minto, “nyiamooku sum rigvdogv laknv jwkrw ngv vjak ngonugv Ahtu okv ninyigv Messiah gvbv ridunv, okv hv dvbvsingtambv rigvdogv la ribv gvvreku!” <sup>16</sup> Vbvrikunamv nyigagatv chamnyi gula apigo Pwknvyarnv gv kaagelo doonv vv bunu atubogv dvbvdootumlo doonv vdww vv bunu atubogv nyukmu nga nyingbub lotola okv Pwknvyarnvnyi kumla ridula, <sup>17</sup> vbv minto:

“Achialv Kairungnv Pwknvyarnv Ahtu, yvvla okv yvvyila!

Noogv kairungnv jwkrw nga laakunam lvgabv okv rigvdogv dubv rirap gvvkunam lvgabv ngonu umbonyikv vdunv!

<sup>18</sup> Pwknvyarnvnyi chimanv vdww haachi toku, ogulvgavbolo noogv haachi chidw ngv aadu kunv, sikunv vdwaka jwngkadaka svngv aadu kunv.

Noogv pakbu, nyijwk vdwa,

okv noogv nyi vdwg vvdw noogv lvgabv  
 kainv lokv lala ila miangnv lo gobv mvngdv  
 dunv vkvgv rijo amin am jidw ngv aaduku.  
 Sichingmooku sum yakmunv vdwa yakmudw  
 ngv aaduku.!”

<sup>19</sup> Pwknvyarnv gv Pwknvyarnvnaam gv riapgu  
 nga nyidomooku lo chikuk pvvtoku, okv hogv ara  
 hoka mingkimiyak nam Jampa nga doodubv kaa-  
 pato. Vbrikunamv doogum dooriak kv riakto,  
 doogummv gumsin gumyinla sito, mobimok kv  
 hvkto, okv kairungnv singnv lvngnv ngv dartoku.

## 12

### *Nyimvmvga gola okv Sichingpanv*

<sup>1</sup> Vbrikunamv kairungnv okv kaakwmanam  
 jenv kaanamgo nyido tolo linamgo kaato. Ho  
 hoka nyimvmvga nvgo, vv doonyi am vjibv kotoo  
 okv poolu nga ninyigv lvpa arwnglo okv takar  
 pwkring gula pwknyi nga ninyigv dumpo lo bio-  
 tung bv binvgo vkvnvgo doodubv kaato. <sup>2</sup> Hv kuu  
 bvngda dvsbv rinvg, okv hv uchichila anga am  
 bvngtv tvvnam lokv ninyia kapgok limuto.

<sup>3</sup> Akodv kaakwmanam godv nyido ao tolo kaa-  
 pato. Ho hoka kairungnv lvngchingnv Siching-  
 panv ako dumpo ngv pwkkanwgo gvnvgo okv  
 rungbung bungringgo gvnv okv ninyigv dumpo  
 pwkkanw lo biotung pwkkanwgo binto. <sup>4</sup> Hv  
 ninyigv nyabung lokv nyido tologv takar karpam  
 aom lokv karpam pamgoni sichingmooku bv  
 paaluto. Hv nyimvmvga nvgv nvchilo dakgu  
 yala rito vkvlvgavbolo vkvgv kuu bvnglin sopikda



dvyā dubv vla mvngto. <sup>5</sup> Vbvrikunamv hv chinggo mvnwng nga riokdwr pogobv bvngtola rigv jinv, kuunyilo go bvnglin toku. Vbvritola anga nga baapu albv dvrikto okv Pwknvyarnv gvlo ninyigv dvbvdootum dooku hoka bvnglwktō. <sup>6</sup> Nyimvmvga nvgv lvgabv, Pwknvyarnv gv dookudaku go mvpvripv jinam, oogv chokrimooku bv 1,260 alu gobv ninyia kaagur kaayen gvnam lvgabv nyimvmvga nvngv kelwk gvvtoku.

<sup>7</sup> Vbvrikunamv nyidomooku tolo gvngv nyimak pami sinamv linduku. Maikel la okv ninyigv nyidogindung ngv Sichingpanv am nyimak pami sila rito, okv Sichingpanv vla ninyigv nyidogindung vdww parwk minsula rito; <sup>8</sup> vbvrijvka Sichingpanv am paya yatoku, okv nw okv ninyigv uyugin- dung am nyidomooku tolo achok goka rimudomu matoku. <sup>9</sup> Kairungv Sichingpanv songa orla ora toku—krimklu gv hogv tabw angv, aminv Uyud- vbv, vmalo Uyu vlaka mindu, nyiamooku nga kupnv ngv. Nw nyila okv ninyigv ajin mvnwng nga sichingmooku lo lvkin gobv orluto.

<sup>10</sup> Vbvrikunamv ngo nyidomooku lokv vkvnv vlvgō gamtv rungbv mindubv tvvpa toku, “Pwknvyarnv gv ringlinbaalin namv vjak aaduku! Pwknvyarnv ninyigv jwkrw nga vjak dvbv gobv ritola kaatamdu! Vjak ninyigv Messiah ninyigv tujupkunam am kaatamto! Vkvlgavbolo Pwknvyarnv gv nvchilo dakdula okv ngonu mvngjwngv ajin am alu ayubv gungnying

---

**12:5** Aij 66:7; Miri 2:9    **12:7** Dan 10:13,21; 12:1; Jud 9    **12:9** Atk 3:1; Lk 10:18    **12:10** Job 1:9-11; Jek 3:1

milwk jinv vdwa nyidomooku lokv orpak lintoku. <sup>11</sup> Bunugv jvjvnnv doin am japgo karnam lokv okv Svlarkuu gv oyi lokv bunu ninyia rigum yatoku; okv bunu tursvdaksv yanga kayu tvkula okv silwk jiya laka rinwng toku. <sup>12</sup> Okv vkvlvgabv nonugv nyidomooku vdwv okv oogv doonv bununo vdwka mvngpu yilaka! Vbvritola sichingmooku okv svmasa lvgabv vdwgo busukano namgobv ridu! ogulvgavbolo nonu gvlo Uyudvbv ngv ilwk toku, okv achialv bv haachi chinwngla moolvngmoyadu, vkvlvgavbolo bunu chinsudu bunugv aluv miang go doomwng duku.”

<sup>13</sup> Vdwlo Sichingpanv angv vv ninyia sichingmooku lo orlu pvkunv mvngla mvngkubvdw, hv kuu yame ako bvngnv nyimvmvga anga marap toku. <sup>14</sup> Schingpanv gv nyimak riku lokv ringlinnam lvgabv, ninyi anying nyingam gola anying patung gobv, chokrimooku ninyigv dookulo hoka jarkunam lvgabv, kiokum nvvtv rungngv gv laap lapnyigo ninyia jitoku. <sup>15</sup> Okv vbvrikunamv hogv nyimvmvga agv vngronam kokwng loku Sichingpanv angv ninyigv gaam lokv svdwng vvsia tvvlin mootoku, ogulvgavbolo ninyia nungla vnggv modubv vla. <sup>16</sup> Vbvrijvka nyimvmvga anga sichingmooku ngv ridur tvku; vv gaam am gamda tvla Sichingpanv gv gaam lokv linv sidvng nga dvmik yatoku. <sup>17</sup> Sichingpanv angv vv nyimvmvga anga achialv bv haachi laku okv ninyigv kuu husi vdwa okv Pwknvyarnv gv gamkinam am tvvnnv vdwa okv Jisu gv kaatam nama mvngjwngnv jwkjwkvrvk bv rin v nyimakrimi

siku nvpv vla vnglin toku. <sup>18</sup> Okv svmasa gv agumai lo Sichingpanv angv ridudakdu.\*

## 13

### *Svnwng anyigo*

<sup>1</sup> Vbvrikunamv ngo svnwng ako svmasa lokv lindubv kaato. Vv rungbung bungringgo okv dumpo pwkkanwgo gvvto; rungbung bongkinbongkin lo bolup pwksakgo gvvto, okv dumpo pwkinpwkin lo Pwknvyarnv gv amin am chiyamiya nam vkvnv gvvto. <sup>2</sup> Svnwng angv kaanamv svnyu ako jvbv kaato, lypa ngv svtam lypa jvbv kaato okv gaamv abwngapa jvbv kaato. Sichingpanv angv ninyigv atubogv jwkrw nga, ninyigv dvbvdooging nga okv ninyigv kairungnv tujupkunam am jito. <sup>3</sup> Svnwng agv dumpo pvgonv ungnv ngvtv bogo gvpvnv jvbv kaato, vbvrijvka ungnv vv geetoku. Sichingmooku dvdv ngv achialv bv lamla okv svnwng agv vngkulo vngming gvvto. <sup>4</sup> Mvnwng ngv Sichingpanv am kumla rinya toku vkvlvgavbolo hv ninyigv tujupkunam am svnwng nga jito. Bunu svnwng ngaka kumla ridula, vbv minto, “yvvla svnwng jvbv rin v ngv? Yvvdw um mvmi sila jin v ngv?”

<sup>5</sup> Svnwng vv kaibojo bv googvla Pwknvyarnvnyi chiyamiya la japkar moola rito, okv vv poolu champi gula pwknyi gv lvgabv tujupkunam am jilwk jito. <sup>6</sup> Vv Pwknvyarnv gv amin am, ninyigv

---

\* **12:18** Sichingpanv angv ridudakdu; Kitap kvgonvlo Okv ngo ridudakdu, Soogv verse ngv ogubv lvkming gvpvdw vbv laadam sito. **13:1** Dan 7:3; Nyim 17:3,7-12 **13:2** Dan 7:4-6 **13:5** Dan 7:8,25; 11:36

dookudaku am, okv nyidomooku lo yvvdw doo-  
dunv oogv vdwa beela riraptoku. <sup>7</sup> Okv vv  
Pwknvyarnv gv nyi am nyimakrimi simu dubv  
jilwk jitoku okv bunua riyayala rimu toku, okv  
mvnwng gv halung dvdv nga, diringmooku nga,  
gaam nvgwng nga, okv opi dvdv nga atu tola rigv  
ladu kubv jitoku. <sup>8</sup> Sichingmooku soogv doonv  
dvdv ngv ninyia kumto, vbvritola nyiamooku sum  
kvvlo gv pwklin yilo turnam kitap lo amin lvklvk-  
nam oogv mvki kunam Svlarkuu gvbv rin v dvv  
vv mvngchik kumato.

<sup>9</sup> “Vbvrikunamv, nonuno nyarung go gv vdu  
bolo tvvtoka! <sup>10</sup> Yvnyi dvrik svngvdw um dvrik  
rungre; yvnyi riukse lokv paki svngvdw um  
riukse lokv paki rungre, svkvnv si Pwknvyarnv  
gv nyi vdwg v chetamrvnam sila okv mvngjwngla  
rirung svngv.”

<sup>11</sup> Vbvrikunamv ngo kvvbi svnwng ako kaad-  
vto, vv soogv sichingmooku lokv linvgo. Vv  
Svlarkuu gv rungbung jvbv kaanv rungbung  
bungnyigo gv vto, okv vkv gv gaam minamv Sich-  
ingpanv gv vlv jvbv minvgo <sup>12</sup> Vv kvvlogv lin-  
cho kunv gv svnwng tujupkunam um ninyigv  
kaagialo rinvdakv toku. Ungngv ngv pola  
rikunv svnwng um, sichingmooku okv oogv rin v  
doonv mvnwng nga kumrung toka vla mili lalato.  
<sup>13</sup> Soogv svnwng anyinvnv vv kairungnv lamrw-  
panam vkvnv rinam am kaatamto; vv mvnwng gv  
nyik kaagia lo nyidomooku lokv sichingmooku so  
vmv nga imu jila dubv mvtoku. <sup>14</sup> Atuake svnwng  
gv kaagelo lamrwpanam vkvnv rinam um kaatam

la sicingmooku soogv rin v doonv nyi mvnwng nga kupla rito. Vbvrikunamv Riukse lokv ungnv gvdu bv mvnam okv vjvgobv turla doobvnyv um mvngdv dubv murti akobv mvdubv bunua svnwng anyinvnyv angv mintoku. <sup>15</sup> Anyinvnyv svnwng angv v turnam saknam go atuake svnwng gv murti lo saklwkto, vbvrikunamv vv gaam japla toku okv yvvdw svnwngsvmin gv murti am kuma dudw um mvki dubv rimu toku. <sup>16</sup> Svnwng angv nyi mvnwng nga miang dolo okv kai dolo, nyitv dolo vmalo heema dolo, nyira dolo vmalo ajarabi dolo bunugv dumpo lo vmalo lakbik peelvlo mvu lvkdubv mili lalato. <sup>17</sup> Bunu mvnwng gvlo mvu namgo kaamabv, bunu oguguka rvvla mare vbv-majeka pioklaka mare. Sikvnyv mvunam si, svnwng gv amin bv lvkmuto okv ogumvnwng lo vkvgv amin am number bv lvklwkto.

<sup>18</sup> Si mvngkimvnglak svgo doodu. Yvvdw chingkipakik lakdunv vv svnwng soogv amin number am mvlm laare, vkvlgavbolo number si ako gogv amin am mvging la mvnvtto. Oogv number am 666 vdu.

## 14

### *Svlarkuu okv ninyigv nyi vdwv*

<sup>1</sup> Vbvrikunamv okv ngo kaato kunamv, jayon moodw lo Svlarkuu ako dakto; vkvkv lvkin bv 144,000 nyi blvgo ninyigv amin am okv ninyigv Abu gv amin am bunugv atubogv dumpo lo lvksu tvla dakto. <sup>2</sup> Okv nyidomooku lokv isi dvngdo tvlunv jv bv tvvnyv okv doogum gunnam jv bv tvvnyv vkvnyv adu duutvrungbv dunvgo ngo

tvvpato. Vv myujik bajala bunugv harp lokv bajanam adu jvbv tvvto. <sup>3</sup> Nyi 144,000 vdvw dvbv dotumnvvnv gv, turnv pwknamyarnam api gv, okv nyigagaatv vdwgv kaagia hoka dakto; Bunu mvngchik vdwgv lvgabv chimu dubv bunu anwnv mirimimpak gaana nga gokmin la ridungto. Bunu oogv nyia opi vdwgv lokv bunu ringlin kunam mvngchikv. <sup>4</sup> Bunu vdww nyimv lo riburburtwng simabv atubonga kachingtamu sula darwknv nyi ngv; bunu vbvrila, bunu nyimv doogvkargv kwmanv. Bunu Svlarkuu gv ogolo vngdudw ho vngkulo vngming gvvdv. Bunu nyia halung lokv arv jila ringlin kunamv okv Pwknvyarnv gvlola okv Svlarkuu gvlo daan lvkcho yachoknv akobv jilin kunamv. <sup>5</sup> Bunu vdwloka mvvnam go bunua tvvpanam kaamato; Bunu rigakpanam kaamato.

### *Nyidogindung aomgo*

<sup>6</sup> Vbvrkunamv kvvbi nyidogindung ako aolo jarkar dubv ngo kaato, okv sichingmooku soogv, opi dvdv nga, halung dvdv nga, nvgwngbv gaam minv dvdv nga, diringmooku dvdv nga Pwknvyarnv gv turbwng jinv alvvnv doin am ninyigv lvkobv mimpa jidubv vla. <sup>7</sup> Hv gamtv rungbv gokla minto, “Pwknvyarnv nga okv vkvgv kairungnv ngam hartv tvvlaka! Ogulvgavbolo ninyigv lvgabv nyi mvnwng nga Jwngkadakadw alu ngv aaduku. Nyidomooku am, Sichingmooku am, svmasa am, okv isigv oolin kongga mvnv nga kumtojotoka!”

<sup>8</sup> Nyidogindung dosinsinv angv atuk gv anga

riming gvdula, minto, “Hv olu toku! Kairungnv Bebilon ngv olu roku! Hv nyi mvnwng nga ninyigv Anggur ngurla nga tvngmu toku—Ninyigv maatar jvnv anggur ngurla ngv gwngmursingmur mvngbio ngv!”

<sup>9</sup> Aumnvny nyidogindung angv atuk anyi nga riming gvdula, gamtv rungbv minto, “Yvvdw svnwngsvmin am okv vkvgv murti am kumlajola okv bunugv tuktumlo vmalo laktik peelvlo mvu nvnga laarwk siredw, <sup>10</sup> bunu atubongv Pwknvyarnv gv anggur ngurla nga tvngre, ninyigv haachiak nvnv anggur ngurla nga, vv vkvgv achialbv haachi chinv nvnv nga akomaring bv ninyigv anggur ngurla kobu lo pwklwk kunamv! mvnwng ngv yvvdw vbv riredw Darwknv nyidogindung gvla okv Svlarkuu gv kaagialo vmvbv gunv okv sulfur bv rinv lo hirukaya more. <sup>11</sup> Vmvgv mvkw ngv bunua mvritnv vv dvbvsingtambv ao bv amcha dvdvre. Yvvdw svnwngsvmin am okv vkvgv murti nga kumdunv okv vkvgv amin am mvu lwkku dunv vv bunu ogu himpu namgo alu logo daka vmalo ayu yupgo daka saknu namgo kaama.”

<sup>12</sup> Si yvvdw Pwknvyarnv gv gamkinam am tvvdunv okv Jisunyi jwkjwkrwk padunv, Pwknvyarnv gv nyi vdwgv lvgabv chitam sila doosv gobv ridunv.

<sup>13</sup> Vbvrikunamv nyidomooku lokv gaamgo ngo vbv mindubv tvvpato, “sum lvkpvtoka: Yvvdw vjak Ahtu gv kudungkua lvgabv sitamdurtum dukudw vv mvngpu nam ngv!”

“Rinamgvbv vvrung!” vla Darwknv Dow ngv mirwk sito. “Bunu rai alvbv riku lokv alvbv doonudaknu nama paasure, ogulvgavbolo bunugv kudungkua rijo ngv bunua vngming gvla rirung riku.”

*Sichingmooku gv aamji am nvvchingnvmu kusv*

<sup>14</sup> Vbvrikunamv okv ngo lvkodv kaadv kunamv, hoka yapungnv doomwkgo doodubv kaapato, okv nyi aingbv kaanamgo doomwk gv aolo doodubv kaato, vv ninyigv dumpo lo ain biotunggo binto okv laak lo ripu rung nv riokchukgo yumbwngto. <sup>15</sup> Hokoching bv kvvbi nyidogindung go Pwknvyarnvnaam lokv linto okv doomwk tolo doonv um gamtv rungbv minto, “Noogv riokchuk am bvngtola okv aam am geeching geemu tokuka, ogulvgavbolo sichingmooku gv aamv nyinduku; vbvrila geeching kusv aluv aaduku!” <sup>16</sup> Vbvrikunamv doomwk tolo doonv vv ninyigv riokchuk am sichingbv mooku bv lvnglu tvla okv sichingmooku soogv geeching svnga geetoku. <sup>17</sup> Hokokwngbv ngo nyido tolo Pwknvyarnvnaam lokv nyidogindung akodv lindubv kaato, okv vvka ripunv riukchok ako bvngto.

<sup>18</sup> Vbvrikunamv kvvbi nyidogindung akodv, vmv nga rigvdubv jinam, erinpeelwkku yugwngmvrwng lokv aadu bv kaato. Hv ripunv riukchok ako bvngnv anga adu dutv rung bv dula vbv minto, “Noogv riukchok am rinvvngnv toka okv sichingmooku soogv anggur nayam vdwa geeto kuka, ogulvgavbolo anggur vdww



nyinduku! <sup>19</sup> Vbvrikunamv nyidogindung angv ninyigv riukchok am sichingbv lvnglu to, okv anggur singnv lokv anggur am geetoku, okv bunua Pwknvyarnv gv haachi gv anggur menjap kolo urlwk jitoku!” <sup>20</sup> Banggu agumai gv anggur minjup linnv am anggur nga nyumjit linto, okv oyiv svdwng bv tvvlinla lvngnyi go (200 miles) asu koyo nvgo okv (5 feet) lvdu angu go ungrwng dukubv anggur minjup nvnv lokv biilintoku.

## 15

### *Chilichilum chinyung am aagvnv Nyidogindung*

<sup>1</sup> Vbvrikunamv nyido tolo kairungnv okv angu sirungnv, kvvbi kaakwmanam akodv kaato oogv nyidogindung vdwv kanw gobv rito vv chilichilum lvvma kanwgo aagv la aato, vv ataranya gv chinyungchinya akin vmwngku, ogulvgavbolo bunu vdwv Pwknvyarnv gv haachi nama anyunganya bv kaatam nvnv vku.

<sup>2</sup> Hokokwng lokuring ngo lvko kaadv tunamv glass gv svmasa akolo vmv dooyo sinam aingbv kaapato. Yvvbunudw svnwng am okv ninyigv murti okv amin am number bv lvklwk konv am rigum yala ripvdw ho vdwaka ngo kaato. Pwknvyarnv gv bunua jikunam harp bajanvnv am bunu vdwv bvngtola okv glass gv svmasa adarlo dakto. <sup>3</sup> Okv Pwknvyarnv gv pakbu, Moses gv mirimimpak gaana nga okv Svlarakuu gv mirimimpak gaana nga vbv gaadungto:  
“Gwlwkyachoknv Pwknvyarnv Ahtu,

noogv kudungkua rinam si vdwgo kairung-  
namgo okv kaasartabo rungnamgo!

Diringmooku\* mvnwng gv Dvby,  
Noogv lamtv dvdv ngv vdwgo sursinv okv  
jvjvny!

<sup>4</sup> Ahtu, nam yvva busu mabv rire?  
Nam yvva miang nvgobv vla mila mare?  
No mvngchik kv Darwkyachok nvngv.

Diringmooku mvnwng ngv nokv lo aare  
okv nam kumrejore,  
Ogulvgavbolo noogv jvjvby rinam dvdv nga  
mvnwng ngv kaapa roku.”

<sup>5</sup> Soogv kokwngbv chikuknam nyidomooku  
tolo, Pwknvyarnvnaam am ngo kaato hogv  
lvkobv Darwknv Tombu vka dooto. <sup>6</sup> Chilichilum  
lvvma kanw nga aagvny nyidogindung  
kanwv, darwknv unglitnv vji am gvvtoku  
okv haakwng lo ain hokpo puching sito kula  
Pwknvyarnvnaam lokv linto. <sup>7</sup> Vbvrikunamv  
oogv turnv pwknamyarnam api lokv akin gonv  
nyidogindung kanw am ain talu pwkkanwgo jito,  
um talu pwkkanw lo turbwngnv Pwknvyarnv gv  
haachiv akomaring toku. <sup>8</sup> Pwknvyarnvnaam  
lo Pwknvyarnv gv yunglitnam lokv okv Jwkrw  
lokv mvkwmvya ngv akomaring pvvtoku, okv  
nyidogindung kanw vdwgv lokv chilichilum  
kanwgo aagv nam vdwv kudungkua nga rinyama  
dvdvlo yvva Pwknvyarnvnaam lo aala mato.

---

\* **15:3** Diringmooku; Manuscripts Kvgonv vbv dooduAnying.  
**15:4** Jer 10:7; Miri 86:9    **15:5** Mog 38:21    **15:8** Mog 40:34;  
1Dv 8:10,11; 2Kri 5:13,14; Aij 6:4

# 16

## *Pwknvyarnv gv haachi gv Talu vdvw*

<sup>1</sup> Vbvrikunamv Pwknvyarnvnaam lokv vlvgo nyidogindung kanw vdwa gaamgo ngo vbv mindubv tvvto: “vngyika okv Pwknvyarnv gv haachi talu pwkkanw am sichingmooku soka pwwlu jitvka!”

<sup>2</sup> Atukchochok gv nyidogindung angv vngla okv ninyigv talu am sichingmooku lo pwwlu jitungu. Yvvdw svnwnv gv amu mvunam doodudw okv vkvvgv murti nga kumnyajonya dudw bunugv awlo maatarbv okv vkvnv achinv ungv nga paamu toku.

<sup>3</sup> Hokoching bvkuring anyinvnv nyidogindung angv ninyigv talu am svmasa aolo Pwwlu jito. Isi ngv kokwng loku sinv nyi akogv oyi jvbv ritoku, okv svmasa hoka turnv pwknamyarnam dvdv ngv singam toku.

<sup>4</sup> Hokoching bv aomnvnv nyidogindung angv ninyigv talu am svko lo okv isi sigung lo pwklwk jito, okv isi vv bunu oyi gobv ringam toku.

<sup>5</sup> Oka isi am rigvyanv nyidogindung ngam vbv mindu bv ngo tvvto, “Yvvla okv yvvyila no jvjv lokv jwngkadakanv, Darwknv Akinnv! <sup>6</sup> Bunu Pwknvyarnv gv nyi vdwgv okv nyijwk vdwgv oyi am pwwlu jito, okv oogv aingbv nonuno oyi am jila bunua tvngmu toku. Bunu ogugo paasv vdw um bunu paadung siduku!” <sup>7</sup> Vbvrikunamv ngo vlvgo yogwngmvrwng lokv milin dubv tvvtoku, “kairungnv Pwknvyarnv Ahtu! noogv

juwngkadaka namv Jvjvdu okv kiamkurkiamrwk madunv!”

<sup>8</sup> Vbvrikunamv apinvnv nyidogindung angv ninyigv talu am doonyi lo pwklwk jito, okv vv nyi vdwa doonyi gv hagu lokv gula gua mootoku.

<sup>9</sup> Bunu vdwa doonyi hagu lokv baayuk jitoku, okv chillichilum aolo rigv kunv tujupkunam Pwknvyarnv gv amin am bunu beeto. Vbvrijvka bunugv rimur lokv mvngdin kumadu okv ninyigv achialv bv kairungnam am hartv madu.

<sup>10</sup> Hokoching bvkuring angunvny nyidogindung angv vv talu am svnwng gv dvbvdooginvnv dookulo pwlwk jito. Svnwng gv karv lo kanv ngv nvlwk toku, okv nyi vdvw atubogv riu am achialvv chiinam lokv gamtwk sila ritoku, <sup>11</sup> okv bunugv ungnv okv achinam lvgabv nyidomooku gv Pwknvyarnvnyi beeto. Vbvrijvka bunu alvmanv lamtv lokv mvngdin mabv ridu.

<sup>12</sup> Hokokwng bvkuring akv nvnv nyidogindung angv vv kairungnv Euphrarates svko lo ninyigv talu am pwwlwkw jito. Oogv donyichaagia peelv gv lokv aanv dvbv vdwgw lamtv rapku lvgabv, svko ngv pvtwngtakar toku. <sup>13</sup> Vbvrikunamv darwkmanv dow aom gunyi tatwk jvbv kaanv go ngo kaato. Bunu Sichingpanv gv gaam lokv linto, svnwng gv gaam lokv okv mvnvrnv nyijwk vdwgw gaam lokv linto. <sup>14</sup> Bunu vdvw uyuvram gv dow lokv lamrwpanam kudungkua nga ridu. Oogv dow aom vv nyiamooku soogv dvbv mvnwng lo, bunua gwlvkyachoknv Pwknvyarnv gv kairungnv alu lo nyimakrimi simu nam lvgabv laakumlapa dobv vngtoku.

15 “Tvvtoka! Ngo dvcho nvgv aingbv aare! Yvvdw vji am alvbv kooto la okv uula doobvnnv vv mvngpuv, ogulvgavbolo vv abinbilin bv vngkar-chakar mare okv nyi mvnwng gv dookumdakum lo hinying paamare!”

16 Vbvrikunamv Hebrew lo Armageddon vnam mooku lo dow vdvw dvbv dvdv nga gokkum la ritoku.

17 Vbvrikunamv kanwnvnnv nyidogindung angv ninyigv talu am doori tapi lo pwlwk jito. Pwkn-vyarnvnaam arwng lo doogingnnv lokv adu dutv rungngv go dulin la, vbv minto, “si rinya roku!” 18 Hokokwng bv dooriakv riaklinla, dooridoogumv, gumsin gumyinla, okv maatar rungbv busunam, moobimok ngv hvkto. Nyi am Pwklinyarlin yilo kongv vdwloka svknnv aingbv moobimok go hvkkw mato; Mvnwng gv lokv mamsvnga alvmaya choknv mobi bv rito! 19 Kairungnv pamtv ngv aom gobv apinayin sitoku, okv diringmooku mvnwng gv pamtv vdvw tak-chitakyi nyami toku. Pwknvyarnv ngv kairungnv Bebilon am mvnggapto okv ninyigv koobu lokv opo nga tvngdubv mvtoku—ninyigv haachi chinam am opo bv tvngmu toku. 20 Bokpin dvdv ngv, okv moodw mvnwng ngv nyemi nyatoku. 21 Nyido tolo gvngv nyi vdwg v aolo tvv pwktv rungngv ngv olu to, apw pwktv ngv kungka rinyi kg chamngu gobv rito. Tvv nga bunu oomu dunvnyi vla Pwknvyarnvnyi beeto, ogulvgavbolo vkvnnv chilichilum si busunamgo bv rito.

---

**16:15** Mt 24:43,44; Lk 12:39,40; Nyikrw 3:3    **16:16** 2Dv 23:29; Jek 12:11    **16:18** Nyikrw 8:5; 11:13,19    **16:19** Aij 51:17    **16:21** Mog 9:23; Nyikrw 11:19

# 17

## *Yunying jardubv yojokarnv*

<sup>1</sup> Vbvrikunamv talu kanwgo doonv nyidogindung kanw gv lokv akin gonv ngoogv duku aala okv minto, “aatoka, okv ngo nam yunying jardubv yojokarnv anga mvrit jijinam am kaatamre, vv oogv siko vdwgv agumai lo kairungnv pamtv mvnam am mindunv. <sup>2</sup> Sichingmooku gv dvbv vdww ninyigv lvkobv yomuryoche gwngmursingmur risarsila rito, okv vbvrinamv nyiamooku gv nyi dvdv ngv kokwng loku ninyigv gwngmursingmur gv opo tvngdung kunam lokv alvmabv tvngkium dooji karnvgobv ritoku.”

<sup>3</sup> Dowv ngam rigvdogvto, okv nyidogindung ngv chokrimooku gulo ngam vnggv toku. Hoka ngo kaato namv lvngchingnv svnwng agv aolo Pwknvyarnvnyi miyakayanam amin am lvknamgo vkgv aolo nyimvmvva anga doodubv kaato; vv svnwng angv vv dumpo ngv pwkkanwto okv rungbung ngv bungringto. <sup>4</sup> Nyimvmvva angv yabubulunv okv yalwngnv vjigo gvvtoku, okv oogv lvkobv ain tasinglaktv go gvvtu, arvdonv vlwng vkvnnv, okv tasing go gvvtu. Hv ninyigv laklo ain koobulo alvmanv okv kasingkanyaknv akomaringnam vkvnnv bvngto, kaakunamv vv ninyigv yojokarnam lokv paanam go. <sup>5</sup> Ninyigv tuktumlo chinchipachi manam vkvnnv amin go lvklwk pvto: “vv kairungnv Babilon, mvnwng gv yojokarnv okv nyiamooku sum alvmanv lo rilum gvnnv anv gobv rito.” <sup>6</sup> Okv oogv nyimvmvva

---

17:1 Jer 51:13

17:2 Aij 23:17; Jer 51:7

17:3 Nyikrw 13:1

17:4 Jer 51:7

angv vv Pwknvyarnv gv nyi vdwgv oyi am okv oogv bunugv mvki kunam gv oyi am tvngkium kootola doodubv ngo kaato ogulvgavbolo bunu Jisunyi mvngjwng la rin vdwv.

Vdwlo ninyia ngo kaabvdw, ngo achialv bv lam-toku. <sup>7</sup> Nyidogindung ngv nga tvvkato. “Nonuno ogubv lamdunv?” “Ngo nonuam Dumpo pwkkanwgo okv rungbung bungringgo gvnv svnwng, nyimvmvga anga gvvnv um, okv amin chinchi manam um ngo nam minjire. <sup>8</sup> Oogv svnwng vv kvvlo turto, vbvrijvka turbv kuma; vv dootarkamanv ungrung lokv linnv ngv okv sijingooji kolo nyedu kubv vngreku. Sichingmooku so dunv nyi vdwv yvvdw turnam gv kitap lo pwknam-yarnam dvdv nga pwkma yarma yilo lokv amin lvkmanam vdwv, svnwng nga kaatola lamngak la rire. Vv kvvlo turto, vbvrijvka vjak turbv kuma, vbvritola lvko aakur dvre.

<sup>9</sup> “Si mvngkimvnglak okv chinsv pasvgobv rirungdu. Nyimvmvga gv dooginnam dumpo pwkkanw vv, moodw dwk kanw ngv. Bunu dvbv kanw gobvchin ridu: <sup>10</sup> Bunugv angu gonv olu toku, akonv vjv gobv rigv dvdu, okv kvvbi akin gonv vjaklodvbv aamadv; vdwlo hv aari kudw, hv achok go rigv mvngrung yinvpv. <sup>11</sup> Okv svnwng ngv kvvlo lvkingo turto, vbvritola vjak turbv kuma, vv dvbv piinw nvbv ridu oogv kanw lokv akin gonv okv vv atubongv sidukubv vngdung duku.

<sup>12</sup> “Nonugv kaanam rungbung bongring ngv dvbv vring ngv oogv vjvlodvbv rirap gvma dvnv

ngv, vbvritola svnwng nga lvkobv gunta akin gv lvgabv dvbv aingbv rigvdubv bunu vdwa tujupkunam jireku. <sup>13</sup> So vring soogv mvngdung sakdung ngv lvyin akinbv ridu, okv bunu vdwv bunugv jwkrw nga okv tujupkunama svnwng nga jireku. <sup>14</sup> Bunu svlarkuu am yalung dami sire; vbvritola Svlaruu ngv ninyigv, goknam vdwa, darnam vdwa okv jwkjwkvrvk bv riming gnv vdwgv lvkobv bunua damya yare, ogulvgavbolo Hv Ahtu vdwgv lokv Ahtu ngv okv dvbv vdwgv lokv Dvbv ngv.”

<sup>15</sup> Nyidogindung ngvka ngam vbv mindvto, “nonu isi kaanam vkv aolo yojokarnv ngv dooto, diringmooku ngv, nyi dvdv ngv, opi dvdv ngv okv gaam minv dvdv ngv. <sup>16</sup> Rungbung bungringgo nonugv kaanamv okv svnwng vv yojokarnv um kaanwng mare; Vkgvlo oguogu doonv dvdv nga bunu dvrik riku okv abinbilin bv ninyia kayu reku; Bunu ninyigv adwn am dvre okv vmv lokv ninyia baayuk reku. <sup>17</sup> Holvgabv Pwknvyarnv ninyigv ridubv mvngdam nama lvkingobv rinam lvgabv bunugv haapok lo rinwng mooto okv Pwknvyarnv gv gaamv jvjv bv ripwnggrinya ma lobv svnwng lo bunugv jwkrw am jitola rigvdogv more.

<sup>18</sup> “Nyimvmvga go nonugv kaanamv kairungv pamtv ngv, vv sichingmooku gv dvbv vdwa rigv duku.”

## 18

### *Bebilon gv yakunam*

<sup>1</sup> Soogv kokwng lo ngo nyidomooku tolo gvngv kvvbi nyidogindung ako idubv kaato. Ninyi



gvlo kairungnv tujupkunamv doodu, okv ninyigv kyaklakyaklin namv sichingmooku mvnwng lo unggoto. <sup>2</sup> Hv gamtv rungbv goklinla minto: “Hv gimup loduku! kairungnv Bebilon ngv gimup loduku! Hv vjak uyuvram gv naam bv riroku okv darwk manv dow gv dukubv riroku; nvg-wngnv kasingkanyaknv okv kaanwng manam pvta mvnwng ngv ninyigv aralo riging doogingbv riroku. <sup>3</sup> Holvgabv ninyigv gwngmur singmur lo mvngbiu monv maatar rungnv opo nga— diringmooku mvnwng ngv tvngtola tvngkium nyaduku. Siching soogv dvbv ngv ninyigv lvkobv alvmabv mvngbiula gwngmur singmur am risar sitoku, okv ninyigv achialv bv mvngbiula sirudraknv aingbv rinam lokv mooku soogv kurvpachu rin mvnwng ngv nyitv nyaduku.”

<sup>4</sup> Vbvrkunamv ngo kvvbi vlv gaam godv nyido tolo gvngv, mindubv tvvpatu,  
linto kulaka, ngoogv nyi vdww, ninyigv ara lokv linto kulaka!

“Nonuno ninyigv aralo vkvnnv rimur aba nga riming gvyoka;

Nonuno ninyigv mvritrit paaji nama orpinorin siyoka!

<sup>5</sup> Ho ogulvgavbolo ninyigv rimur rinamv dosindoyinla nyidokolo chaachi duku,  
okv Pwknvyarnv ninyigv alvmabv rimur rinam lamtv nga mvngpadunv.

<sup>6</sup> Hv nam oguaingbv ribvdw vbvchingching ninyi-aka ritv ngurv tvka;

---

**18:2** Aij 21:9; Jer 51:8; Nyikrw 14:8; Aij 13:21; Jer 50:39 **18:3**  
Aij 23:17; Jer 51:7 **18:4** Aij 48:20; Jer 50:8; 51:6,45 **18:5** Atk  
18:20,21; Jer 51:9 **18:6** Miri 137:8; Jer 50:29

Hv oguaingbv jibvdw vbv um kaiyabv anyi  
yago jikur toka.

No lvgabv oguaingbv tvngmu dubv rungji pvdw  
vbvchingching ninyigv kobu lo maatar bv  
anyi yago dwkdubv pwkbiung lwkjilaka.

7 Ninyi vdwgo atubongv yunglit dukubv okv  
jemin dubv jipvdw  
vbvchingching achialv bv hirukaya nga okv  
mvngrunguya nama ninyia jitoka!

Ogulvgavbolo ninyi atubongv minbwngto:

‘Ngo svka, dvnv akobv doodunv!

Ngo hvngmi ma,

ngo vdwloka mvngrunam chimare!’

8 Vkvlgabv, Hv alu gunyi chilichilum lokv ninyia  
dvngre—

vv lvvma ngv, mvngrunguya, okv dvma-  
yarwng ngv.

Okv ninyia vmvlo baayuk reku,

vkvlvgavbolo Pwknvyarnv Ahtu, ninyia  
jwngkadakanv vv gwlvkyachok nvngv.”

9 Ninyigv mvngbiu okv gwngmur singmur rim-  
ing gvvnv sichingmooku gv dvbv vdwv bunu vd-  
wlo ninyia vmv ramnam gv mvkwmvya nga kaa-  
tola pamtv oogv lvgabv nyikla sarla okv kapla  
rireku. 10 Ninyigv hindarkaso hingkulo himing  
gsvv nga bunu busu la rinam lokv bunu adu lo  
dakdu. Bunu vbv minre, vdwgo busunamgo bv  
ridu! vdwgo mvngdwk namgobv ridu! kainv okv  
gwlvknv Bebilon pamtv ngv! nonua gunta akin lo  
mvriririt roku.

11 Sichingmooku gv kurvpachu mvnv vka ninyigv lvgabv kapla okv mvngruto, ogulvgavbolo bunugv yikungyira nga yvvka rrvjinv kaakuma; <sup>12</sup> Yvvka bunugv ain am, raaji am, kurvdonv vlwng am, okv tasing am; bunugv pakria, lwngbubulu vji, alapnv tanu, okv lvngdwkkswknv vji; paala nyumanv singda, okv svtv hijung lokv mvnam nvgwngnv, okv maatar alvbv arv doonv singdasingpo, daaching riokdwr, riokdwr, okv marbol; <sup>13</sup> okv namnwnv sinamon vsing, nvgwngnv namnw, nampunv, namunama bv mvnam, okv singlumlumbak; anggur ngurla, okv teli, ata okv gehu, svv okv svlar, gora, okv yira gvnv gari, nyira, okv vv tikmabv nyia turnv vkvnv um yvvka rrvnv kaamare. <sup>14</sup> Kurvpachu mvnv vdwv ninyia minre, “noogv atubogv lvgabv alvnnv yikungyira mvngnamv nyeroku, okv noogv nyitv tvgvnv dvdv ngv okv vkvnv kaaputain nam dvdv ngv nyeroku, okv no lvkoka um mapa kumare!” <sup>15</sup> Kurvpachu mvnv vdwv, oogv pamtv lo yvvbunu kurvpachu rila nyitv kubvdw ho vdwv, adu bv dakreku, ogulvgavbolo bunu vdwv ninyigv hindarkaso nga paaming gvjikkv vla busuto. Bunu vdwv kapre okv mvngrure, <sup>16</sup> okv minre, “vdwgo busunamgo bv ridu! kainv pamtv lvgabv vdwgo mvngru namgobv ridu! Hv maatar alvbv arv doonv vji am gvla rito, lvngbubulunv, lvngdwkkswknv, okv ain tasing vkvnv gvla, arv doonv vlwng, okv moti tasing vkvnv gvla rito! <sup>17</sup> Okv vjak gunta akin gobv ninyigv nyitv ngv

**18:11** Eje 27:31,36**18:12** Eje 27:12,13,22**18:15** Eje 27:31,36**18:17** Aij 23:14; Eje 27:26-30

sibv nyengam roku!”

Svpw mvnwng ngv rigvnu vdwv okv hoka vngnvchanv vdwv, svpw svnv vdwv okv svmasa gv hoka yvnbunu kudungkua rila pwlapaala turnam lvgabv rinu kvvbi vdwvka adu lo dakreku, <sup>18</sup> okv ninyia vuv lokv ramla mvriak taachanam mvkwmva nga kaatola bunu kapgokla kaptoku: “Vkvnu pamtv aingbv kvvbi pamtv yago doomato!” <sup>19</sup> Bunugv dumpo aolo pvmvr nga jongpv modula, bunu kapla okv mvngrula, mindungdu, “vdwgo busunamgo bv ridu! kainv pamtv lvgabv vdwgo mvngru namgobv ridu! Hv vkvnu pamtv bv rito ninyigv yikungyira lokv svpw svnv vdwvka kokwnglo nyitv tvvlin nvla ritoku! Okv vjak gunta akin lo vkvgv ogumvnuwng ngv nyengam roku!” <sup>20</sup> Nyidomooku ngv, ninyigv mvyakriyak kunam lvgabv, mvngpu laka! Pwknvyarnv gv nyi vdwv okv Apostol vdwv okv nyijwk nyikiuk vdwv! mvngpu laka, ogulvgavbolo nonua oguaingbv hv mvpvdw Pwknvyarnv ninyia miyakaya duku!

<sup>21</sup> Vbvrikunamv nyidogindung kairungnv akonv vlvng lvngdo Pwktv rungngv go laarapto okv svmasa bv orlwk dula, vbv minto, “Svbnam pamtv kairungnv Babilon am orli lala lwkreku okv lvkoka kaapa kumareku. <sup>22</sup> Harp baja namgv miujek okv nyia vdwgv adu dunam, pungli tapnam okv tapu minam vdwa nonugv aralo vdwloka lvkodv tvvpa kumare! Kurvpachu mvnu kudungkua rinu nyi vdwgv; okv tami aam

---

**18:18** Eje 27:32    **18:19** Eje 27:30-34    **18:20** Det 32:43; Jer 51:48    **18:21** Jer 51:63,64; Eje 26:21    **18:22** Eje 26:13; Aij 24:8  
**18:22** Jer 7:34; 25:10

garmvknam lvngcho adu goka noogv ara lokv vdwloka tvvpa kumare! <sup>23</sup> Vdwloka mvdurupum gv loung goka noogv ara lokv kaapa kumare; Vdwloka nyimv okv nyilo laami sinam vkvnv adu goka noogv ara lokv tvvpa kumare. Noogv kurvpachu rinngv ngv nyiamooku so mvnwng gv kaiyachok bv rito, okv noogv lama himur namv mooku soogv nyi mvnwng nga gwngkupto!”

<sup>24</sup> Nyijwk vdwgv oyi am okv Pwknvyarnv gv nyi vdwgv oyi am pamtv ara hoka paatoku; vjemabv, sichingmooku soogv nyi vdwa pakipamar kunam gv oyi am paakulo Bebilon pamtv nga mvriririt toku.

## 19

<sup>1</sup> Soogv sum tvvpanam kokwng lo nyidomooku tolo gvngv nyi nyitwng gv rumdu dunam ainggo tvvpatu, vbv minto, “Pwknvyarnvnyi hartv laka! ringnambaanamv, yunglitnamv, okv jwkrwv ngonugv Pwknvyarnv gv ngv! <sup>2</sup> Ninyigv jwngkadaka namv jvjv dunv okv sursimai dunv! Ninyigv lvkobv gwngmursingmur la sichingmooku sum alvmabv rigvnnv yojokarnv um hv miyakaya toku. Pwknvyarnv ninyia mvriririt toku ogulvgavbolo hv ninyigv pakbu vdwa mvki sito.” <sup>3</sup> Bunu lvkodv gokrvdvtu, “Pwknvyarnvnyi hartv laka! Mvriak taachala kainv pamtv nga guyuknam mvkwmvya ngv dvbvsingtambv sokchaa dungdu!” <sup>4</sup> Nyigagatv chanyi gula api okv turnv pwknamyarnam api ngv oogv dvbv dotumlo doonv Pwknvyarnvnyi

bunu gublwk dula okv kumlajola rito. Bunu minto, “Pwknvyarnvnyi hartv laka! Amen!”

*Svlarkuu gv nyida dvpam*

<sup>5</sup> Vbvrikunamv dvbvdotumnvnnv lokv vlv gaam go aala, vbv minto, “ninyigv pakbu dvdv ngv okv nyi mvnwng ngv, kai nvngv jvka okv miang nvngv jvka, yvvdw ninyia mvngdv dudw ngonugv Pwknvyarnvnyi hartv laka!” <sup>6</sup> Vbvrikunamv ngo nyitwng mvnwng gv gaam adu ainggo tvvpatu, vv isi dvngdo adu aingbv, okv doogumgunnam jvbv, ngo tvvpatu. Ngo bunua vbv mindubv tvvto, “Pwknvyarnvnyi hartv laka! ogulvgavbolo Ahtu, ngonugv kairungnv Pwknvyarnv dvbv ngv!” <sup>7</sup> Klai ngonu harjuk milaju okv mvngpu laju; Kaju ngonu ninyigv kainama hartv laju! Ogulvgavbolo Svlarkuu gv nyida ridwv aaduku okv nyida lvgabv nyimv nyamji nvngv atubongv ripvdakpv sutoku. <sup>8</sup> Darwknv ungnv vji am ninyia koomu toku.” (Kaapunv vji vdwv Pwknvyarnv gv nyi vdwgv alvnnv kudungkua ngv.)

<sup>9</sup> Vbvrikunamv nyidogindung ngv nga minto, “lvktoke sum: yvvnyi Svlarkuu gv nyida dvpam lo gokpa pvdw vv bunu mvngpuv.” Okv nyidogindung ngv mindvto, “soogv minam si Pwknvyarnv gv jvjvnnv gaamv.”

<sup>10</sup> Ngo ninyia kumnamjonam lvgabv ninyigv lvchu kampwk lo guba lwkto, vbvrinamv hv nga minto, “no vbvriyoka! Ngo noogv lvkobv okv kvvbi mvngjwngnv ajin Jisu gv kaatam nama jvjv

nga gakbwng la rinw vdwwgv lvkobv ridum ming-gvnnv pakbu akonv. Pwknvyarnvnyi kumtojoto laka!”

Ogulvgavbolo Jisu gv jvjvnnv kaatamnam si nyijwk vdwwgvlo dow jilwkkunam ngv.

*Yapungnv gora lo joknv*

<sup>11</sup> Vbvrikunamv ngo nyidomooku nga chikuk dubv kaato, okv hoka yapungnv gora ako dooto. Hogv gorajoknv um jwkjwkwrvwknv okv jvjv ngv vto; hv jvjv lokv jwngkadakadu okv vbv vv ninyigv nyimak aka rimisidu. <sup>12</sup> Ninyigv nyikv vmvgv mvriak jvbv ridu, okv hv ninyigv dumpto lo dumlup achialvgo bintoku. Hv ninyigv aolo amin lvknam go doodu, vbvritola ogugo lwkpvdw um yvvka kaachin ma vbvritola ninyi atubongv mvngchik um chinsudu. <sup>13</sup> Vkvvgv vji gvvnammv oyi gobv ridu. Vkvvgv aminv “Pwknvyarnv gv Gamchar.” <sup>14</sup> Nyidomooku gv sipai vdww darwknv yapungnv vji vkv gvvtola okv yapungnv gora lo dootola ninyia vngming gvvdv. <sup>15</sup> Diringmooku mvnwng nga paya yanvnnv riukse ripu nvgo, ninyigv napa lokv lindu. Hv riokdwr riokda lokv bunua rigv nvre, okv Hv kairungnv Pwknvyarnv gv haachi gv opo minjup nvnv lo opo nga menjapla limure. <sup>16</sup> Ninyigv vji lola okv harpo lo vbv lwknam amin go gvvdv: “dvbv vdwwgv lokv Dvbv ngv okv atu vdwwgv lokv Ahtu ngv.”

<sup>17</sup> Vbvrikunamv ngo doonyi gv aolo nyidogindung ako dakdubv kaato. Ninyi dopintain tvso pvta jarnv mvnwng am adu dutv rungbv gokto:

“Pwknvyarnv gv kairungnv dvpam pamdubv aadum sidubv aatoka! <sup>18</sup> Aatoka okv dvbv vdwgv adwn, sipai am rigvnv vdwgv adwn, okv sipai vdwgv adwn, okv gora vdwgv okv gorajoknv vdwgv adwn, okv nyi mvnwng gv adwn, okv nyira vdwgv adwn, okv ajarabi bv rin v adwn, okv kainv okv miangnv vdwgv adwn am dvdubv aatoka.”

<sup>19</sup> Vbvrikunamv kuring ngo svnwng okv sichingmooku gv dvbv vdwa okv bunugv sipai vdwa adum sitola hogv gora aolo doonv um la okv vkvgv sipai nga yalung bv padap minsu dubv vla aakum dubv ngo kaato. <sup>20</sup> Svnwng am patwk lo bootoku, ninyigv kaagia lo kaasartabo bv rila mvvla rin v oogv nyijwk kupnv umka laadumsila bootak svto. (Vbv lamrwpanam bv rila hv bunua svnwng gv mvunam okv murti am kumlajola rin v bunu vdwa mvvkup rukupto.) Svnwng umla okv mvvnv nyijwk um anyia sulphur gv vmvgv svmasa bolo turdubv orlwkto. <sup>21</sup> Bunugv sipai vdwa oogv gora aolo doonv gv gaam lokv lin v riukse lokv paki toku; okv bunugv svma adwn am pvta mvnwng ngv dvnya nyoku madu bv dvmin toku.

## 20

### *Hejar akin anying*

<sup>1</sup> Vbvrikunamv nyidomooku tolo ngv nyidogindung ako idubv ngo kaato, ninyigv laaklo dootarkamanv ungrung gv chabi am okv ai rung v jaako sogo bvngto. <sup>2</sup> Hv singchingpanv nga laatungto, kvvlo gv abuapa tabwgo—vv Uyudvbv, vmalo um Uyu vlaka mindu—okv



hejar akin anying lokv jaako leela apv kunamgo. <sup>3</sup> Nyidogindung angv dootarkamanv ungrung lo orlwk tvla, um tala yitam pvto, okv siel tuprw pvvto, vkvlgavbolo hejar akin anying ngv vngma dvdvlo gov hv diringmooku dvdv nga kupma dubv vla. Hoogv kokwng loku ninyia dw achok gv lvgabv tulin jireku.

<sup>4</sup> Vbvrikunamv kuring ngo dvbvdotumnvvnv vdwa kaato, okv hoogv dotumnvvnv lo doonv bunu vdwa jwngkadaka nvnv jwkrw am jito. Jisu gv kaatamnam jvrv okv Pwknvyarnv gv gaam am minggu karnam lvgabv pakikunam vdwgv yalu am ngo kaato. Bunu vdvw svnwng okv bunugv murti am kumajomadu, vmajvka bunugv dumpto lo okv bunugv laak lo svnwng gv muunam goka laarwk simato. Bunu turnam lo aadu kula okv hejar akin anying gv lvgabv dvbv bv ritola Jisu gv lvkobv rigv minggv riku. <sup>5</sup> (Sinv Kvgonv turkur madvvnv vdvw hejar akin anying ngv vngma dvdvlo gov turkur kumato.) Soogv si sinv vdwgv chaacho chochok ngv. <sup>6</sup> Sinv vdwgv turtuturke so yvvdw turkur minggv dunv vv mvngpu okv kairungbv boktalwknamv. Lvnyinvbv sinv vv bunua rigv lamare; Bunu Pwknvyarnv gvla okv Kristo gv nyibu gov rireku, okv bunu ninyia lvkobv anying hejar akin lvgabv rigv minggvre.

### *Uyudvbv nga rigum yakunam*

<sup>7</sup> Anying hejar akin gv kokwng lokuring, Uyudvbv nga patwk lokv tulin la rireku, <sup>8</sup> okv hv sichingmooku gv diringmooku tloblov doonv nga kuptv bv vngre, vv Gog okv magog nga mindunv.

Uyudvbu ngv bunu vdwa yalung damisinam lv-gabv laadam sire, vv bunu svmasa gv chokri kiilakumanam gv aingbv rire. <sup>9</sup> Bunu sichingmooku mvnwng lo doosik kartoku okv Pwknvyarnv gv nyi vdwgv keem nga okv ninyigv paknam pamtv nga goyum toku. Vbvritola nyidomooku tolo gvngv vmv ngv oolula bunua guyuk toku. <sup>10</sup> Vbvrikunamv oogv bunua kupnv, Uyudvbu um kvvlo gv svnwng okv mvnv nyijwk am orlwk roku hoka orlwktoku, okv oogv orlwkku vv sulfur okv vmvgv svmasa ngv; okv bunu alu okv ayu bv hirukaya nga dvbvsingtambv paabvla riku ngv.

*Anyunganya bv Jwngkadakanam*

<sup>11</sup> Vbvrikunamv kairungnv yapungnv dvbv-dotumnvnu ako okv vkgv aolo doodunv um ngo kaato. Sichingmooku okv nyidomooku ngv ninyigv duku lokv Vjakgovv kiyu toku okv lvkodv kaapa kuma. <sup>12</sup> Okv ngo sinv vdwa kaainv okv miang nvngaka dvbvdogingnvnu kaagia hoka dakdubv kaato. Kitap vdwa taakuk pvvto, okv kvvbi kitap goka taakuk pvvto, vv turnam gv kitapv. Sikunv vdwgv bunu ogugo ripvdw, kitap lo lvklwk kunam aingbv, um jwngkadaka toku. <sup>13</sup> Vbvrikunamv svmasa lo yvvbunudw silwk pvkunv ho vdwa isi ngv lvkodv tvvlin jitoku. Sinam okv sinv mvnwng gv nyiamookuv bunu vdvwka sinv dvdv nga jilin jitoku. Okv mvnwng ngv bunu ogugo ripvdw um vbvrinam lokv jwngkadaka toku. <sup>14</sup> Vbvrikunamv sinam okv sinv vdwgv mooku am vmvgv svmasa lo orlwk

nyatoku. (Soogv vmvgv svmasa si situm lvnyin-  
vnu vku.) <sup>15</sup> Soogv turnam gv kitap so yvnyi  
amin lvklwk mapvdw bunu vdwa vmvgv svmasa  
lo orlwktoku.

## 21

### *Anwnv Nyidomooku okv Anwnv Sichingmooku*

<sup>1</sup> Vbvrkunamv ngo anwnv nyidomooku go okv  
anwnv sichingmooku go kaato. Atukchochok gv  
nyidomooku ngv okv Atukchochok gv siching-  
mooku ngv nyetoku, okv svmasa ngvka nyetoku.

<sup>2</sup> Okv Darwknv Pamtv vv, anwnv Jerusalem  
ngv, Pwknvyarnv gv nyidomooku lokv, nyimv  
nyamnv gv, gvkigvak tvla okv ninyigv nyilu nga  
kaarwk sitvnam aingbv anwnv Jerusalem ngvka  
mvpvripv tvkula ninyia, idubv ngo kaato. <sup>3</sup>  
Ngo dvbvdotumnvnnv tolo gvngv gaam adu dutv  
rungv go vbv mindung dubv tvvpato: “Vjak  
Pwknvyarnv gv naamnasung ngv nyi vdvgv  
lvkobv dooduku! Ninyi bunua lvkobv dooming  
gvriku, okv bunu vdww ninyigv nyi bv rireku.  
Pwknvyarnv nw awv bunua lvkobv dooreku,  
okv Nw bunugv Pwknvyarnv bv rireku. <sup>4</sup> Nw  
bunugv nyiklo nyiksi dwkla kapnama tikak reku.  
Hoka sinamyamam ngv, tinggwnyilin ngv, vmalo  
kapnamrinam vmalo achiapik go kaakumare.  
Vkvlgavbolo Kvvlo gv akunv ogumvnnwng ngv  
nyetoku.”

<sup>5</sup> Vbvrkunamv hogv dotumnvnnv lo doonv ngv  
mintoku, “Vkvlgavbolo vjak ngo ogumvnnwng

**21:1** Aij 65:17; 66:22; 2Pit 3:13

**21:2** Aij 52:1; 61:10; Nyikrw 3:12

**21:3** Eje 37:27; Leb 26:11,12

**21:4** Aij 25:8; Aij 35:10; 65:19

nga anw nvbv mvreku!” Hv ngam vbvka mindvto, “sum lvpvtvka, ogulvgavbolo soogv gaam si jvfv ngv okv vv mvngjwng nyoladu.” <sup>6</sup> Okv hv minto, “Sum riroku! Ngo atukchochokkv okv ataranya ngv, rirapnv okv ripinnv. Yvvdw isi tvngnwng dunv um ngo sirung lokv holinnv turnam gv vsi am tvngdwlo tvngjo kaamabv anyubv tvngmure. <sup>7</sup> Yvvdw rigum yadunv um ngokv lokv sum laarwk simure: Ngo ninyigv Pwknvyarnv bv rire, okv vv bunu ngoogv umvuu bv rire. <sup>8</sup> Vbvritola mvngbid ribid manv, rukupmvvkupnv, rima svnga rinu, minv lvnv, gwngmursingmur, vbv yvvdw lama hisarsinv, yvvdw murti kumdujodunv, okv mvnvrnunv mvnwng ngv— Sulfur bvla okv vmv lokv gula svlv bv rinu vv, bunugv lvgabv dookudaku ngv, so si lvnyi nvnv bv sikunam vku.”

### *Anwnv Jerusalem ngv*

<sup>9</sup> Nyidogindung kanw gv lokv talu pwkkanw lo akomaring bv chilichilum kanwgo doonv hogv akonv vv ngo dookubv aato okv minto, “aatoka, okv nyimv nyamn, Svlarkuu gv nywng nga kaatamre.” <sup>10</sup> Dow lokv nga rigv dula, okv nyidogindung ngv nga moodw dwtv yachok nvgv dumpum tolo jarcha gvvtu. Hv nga Jerusalem, darwknv Pamtv nga, Pwknvyarnv gv nyidomooku lokv idubv kaatamdo <sup>11</sup> okv Pwknvyarnv gv yunglit lokv ungtato. Pamtv yunglitnamv arv doonv vlvng aingbv, jaspas aingbv, rvbwngvrwng bv kraistal vlvng aingbv. <sup>12</sup> Vv

achialvbu kairungvu aokokonvu vlvung singlung  
 agi geering gula geenyi go dooto okv hogv agi am  
 nyidogindung vring gula anyigo rigv mooto. Hogv  
 agi hoka Israel nyi vdwgv vpin vring gula anyi gv  
 amin am lvklwcto. <sup>13</sup> Hogv atungasak lo agi am  
 geom go doomuto: agi geom gonv donyichaagia  
 peelvlo doodu, geom gonv ako peelvlo doodu,  
 agi geom gonv adum peelvlo doodu, agi geom  
 gonv doonyi aagia peelvlo doodu. <sup>14</sup> Hoogv pamtv  
 gv vlvung svlung ngv lvngtung vring gula anyi gv  
 aolo mvtoku, vlvung lvngtung tungpvnam hoka  
 Svlaraku gv Apostol vring gula anyi gv amin am  
 lvklwcto. <sup>15</sup> Nyidogindung ngam gaam minamv  
 pamtv okv pamtv gv agi vdwa okv vlvung svlung  
 nga kiika nvdubv ain vtak tago bvngto. <sup>16</sup> Pamtv  
 nga atung asak bv agingayur bv karing sichingto.  
 Nyidogindung ngv pamtv nga ninyigv kiinvv vpi  
 singkio lokv kiikanamv: Apv, ayur, ao am okv  
 adam am kiika la rinamv two thousand four hun-  
 dred kilometre; fifteen hundred miles mvnwng  
 ngv karing sichingto. <sup>17</sup> Nyidogindung ngvka vl-  
 wng svlung nga kiikato, okv ninyigv kiibv nvnv  
 lokv kiikanamv vkvgv jwngcham\* ngv 216 feet; 60  
 metres gobv ritoku.† <sup>18</sup> Vlvung svlung vv jaspar vl-  
 wng lokv mvto, okv pamtv nga ain jvju mvngchik  
 lokv mvto vv sisa gv aingbv kaarpaparto. <sup>19</sup> Pamtv  
 gv vlvung svlung gv vlvung lvngtung tungnam am  
 arv doonv vlvung lokv mvrwmvgo nvto. Lvngtung  
 tungchonam vlvung ngv jaspar vlvung lokv mvto,

---

**21:15** Eje 40:3      \* **21:17** ao ngv; Vmalojwngcham.      † **21:17**  
 Soogv verse si 16 okv 17 nga Greek text gv 12,000 unit akin gobv  
 vdu okv 144 “cubit” vdu hogv quality nga kaatamdu.      **21:18** Aij  
 54:11,12

anyi nvnv sapire vlng nga mvnto, aumnvnv egate vlng lokv mvnto, apinvn vlnv emerald vlnv nga mvnto, <sup>20</sup> angunvnv oneks vlng nga mvnto, akvnvnv karnelian vlng nga mvnto, kanwnvnv kuarch vlng nga mvnto, piinwnvnv berils vlng nga mvnto, kianvnv ngv topaj vlng nga mvnto, vringvnv kalsidoni vlng nga mvnto, vring gula akinnvnv turkois vlng nga mvnto, vring gula anyinv emetes vlng nga mvnto. <sup>21</sup> Agi vring gula anyiv mooti vlng lokv; agi gekingekin nam mooti vlng akin lokv mvnto, Pamtv gv lamtv nga sisa kaorpapvr bv unglav dubv ain jvjv lokv mvngchik lokv mvto.

<sup>22</sup> Pamtv aralo ngo Pwknvyarnvnaam go kaapama, ogulvgavbolo Pwknvyarnvnaam si Ahtu Pwknvyarnv kairungnv ngv okv Svlarkuu ngv.

<sup>23</sup> Pamtv nga doonyi vmalo poolu gv loung go unglav svgo kaama ogulvgavbolo Pwknvyarnv gv yunglit gv loung ngv um unglav okv Svlarkuu ngv vkvgv mvdurupum bv risudu. <sup>24</sup> Nyiamooku soogv nyi vdww soogv loung so vngkar riku, okv sichingmooku soogv dvbv ngv bunugv yikungyira vdwa so bvngnga lwkjire. <sup>25</sup> Pamtv gv agi ngv aludwkibv chikuk tvla doobvre; bunu vdwlaka chiktum kumare, ogulvgavbolo hoka vdwlaka kanvnam kaakumare. <sup>26</sup> Diringmooku gv Kainam okv yikungyira mvnwng nga pamtv so bvngnga jireku <sup>27</sup> Vbvrivotla darwkmanv vmalo yvvdw hinyinghiru nam ridudw vmalo mvvnamrunam ngv soogv pamtv so aala mare. Yvvgv amin am Svlarkuu gv turnv kitap lo lvklwk pvdw vv

mvngchik pamtv hoka aalare.

## 22

<sup>1</sup> Nyidogindung ngv Pwknvyarnv okv Svlarkuu gv dotumnvnnv lokv, Kraistal aingbv klingklaknv, turnam jinv isi svko um nga kaatamto <sup>2</sup> okv Pamtv gv lamtv lvpa jelo biiko lodu. Isi gv Tagotaksak bv turnam gv singnv ngv, vv anying nga lvring gula lvnyi go asi svnnv ngv, poolu dwkibv lvkolvko svvdu; okv vkvgv anv ngv diringmooku vdwgv lvgabv mvpunv. <sup>3</sup> Pamtv ara hoka vdwloka Pwknvyarnv gv beenam vkvnnv oguguka mapa mare.

Pwknvyarnv gv dotumnvnnv okv Svlarkuu ngv pamtv ara hoka doore, okv ninyigv pakbu vdwv ninyia kumlajola rire. <sup>4</sup> Bunu ninyigv nyukmu am kaapare, okv ninyigv aminv bunugv tuktumlo lvklwk pvvre. <sup>5</sup> Hoka ayukanv kaaku mare, bunu mvdurupum bvngdubv riku mare vmalo doonyi loung dubvka rikumare ogulvgavbolo Pwknvyarnv Ahtu bunugv loung bv rireku, okv bunu dvbv gv aingbv dvbvsingtambv rigvriku.

### *Jisu gv aanam*

<sup>6</sup> Vbvrikunamv nyidogindung ngv ngam minto, “Soogv gaam si jvrv ngv okv mvngjwng svvngv. Okv Pwknvyarnv Ahtu oogv nyijwk vdwa ninyigv dowv jijinv vv, ninyigv nyidogindung nga gugur alvbv ogugo ritv tvvdu kunvdw ninyigv pakbu vdwa kaatam dukubv imuto.”

---

**22:1** Eje 47:1; Jek 14:8    **22:2** Atk 2:9    **22:3** Jek 14:11; Atk 3:17  
**22:5** Aij 60:19; Dan 7:18

<sup>7</sup> Jisu minto, “tvvgap laka!” “Ngo baapubv aadung dukunv! Soogv kitap aralo yvvdw nyijwkgaaam vdwgv mingkulo tvvdunv vv mvngpuv!”

<sup>8</sup> Ngo, Jon kv, soogv ogumvnwng dvdv sum tvvnnv okv kaanv ngv. Okv vdwlo ngo tvvdung nama tvvnya kubvdw okv bunua kaadung nama kaanya kubvdw, soogv ogumvnwng nga kaatam nngv nyidogindung gv lvpalo, ngo gumpv tvla ninyia kumtvto. <sup>9</sup> Vbvrijvka hv minto, “vbvriyoka! Ngooka no lvkobv pakbu akobv ribam dubv okv nonugv achiboru nyijwk vdwgv lvkobv ribam dubv okv mvnwng ngv yvvdw soogv kitap so gaam am tvvdunv um ribamn ngv mvngchikgo. Pwknvyarnv yanyidv kumtojoto laka!” <sup>10</sup> Okv hv ngam minto, “soogv kitap soogv nyijwkgaaam sum vvsila rimabvka ogulvgavbolo vdwlo soogv mvnwng si ritvngtv dunv si ridwv achialvbv kvnvk duku. <sup>11</sup> Yvvdw alvmanv kudungkua ridung sududw, vv alvmabv ribv sirungpv lage okv yvvdw kasingkanyaknv kudungkua ridudw vv kasingkanyaknv kudungkua lo ribv sirungpv lage; yvvdw alv dudw vv alvnnv kudungkua lo ribv sirungpv lage, okv yvvdw darwkdunv vv darwkbv ribv sirungpv lage.”

<sup>12</sup> Jisu minto, “tvvgap tvka!” “ngo baapu bv aadung dukunv! Ngoogv amin jisv nga ngo gvvla aagv rikunv, nyichar dvdv ngv vkgv atubogv rinam lokv um jireku. <sup>13</sup> Ngo atukchochokkv okv ataranya ngv, okv rirappv okv ripinnv.”

---

**22:11** Dan 12:10    **22:12** Aij 40:10; 62:11; Miri 28:4; Aij 40:10; Jer 17:10    **22:13** Nyikrw 1:8; Aij 44:6; 48:12; Nyikrw 1:17; 2:8



14 Yvvdw bunugv atubogv vji nga rvvkak kakupung sudunv vv mvngpu namv okv turnam jinv singnv lo asi svvnv nga dvla dunv, okv Pamtv aralo agi lokv aala dunv. 15 Vbvritola pamtv agum lokv doonv vv rima svnga rinngv okv lamahinv, gwngmursingmurnv, okv pakipamarnv, yvnbunu murti kumnvjonv okv gaam lokvka okv kudungkua lokvka mvvkup rukupnv vv agum lo ridu.

16 “Ngo, Jisu, ngoogv nyidogindung nga nonu gvlo soogv ogumvnwng sum mimpa jimu dubv gvrja dvdv gv aralo aamuto. Ngo Dabid gv vpin lokv husi linv ngv; Ngo lvgu takar lo karlum pumpumv.”

17 Dow vla okv nyimvnyamn v ngv minto, “aatoka!”

Yvvdw sum tvvnv dvdv ngvka mirungto, “aatoka!”

Aatoka, yvvdw tvngnwng dudw; turnam jinv isi am jinyu gobv jinam am, yvnbunu mvnggi dudw laarwk sitoka.

### *Lvknyunglvknya kunam*

18 Ngo, Jon, kitap soogv nyijwkgam sum tvvgapnv mvnwng nga gamrw dunv: Yvvdw soogv sum ogu achukguka lvktamyaya lwkredw, bunu vdwa soogv kitap sokv lvklwknam chilichillum am mvritririt nam lvgabv Pwknvyarnv lvktamyaya jire. 19 Okv yvvdw soogv kitap sokv nyijwkgambv minjinama laapak jiredw, Pwknvyarnv turnam jinv singnv gv asi am okv darwknv pamtv lo aapa dubv bunugv

baak am kitap sokv lvklwknama laapak la laa jireku.

<sup>20</sup> Yvvdw ninyigv sikvnv gaam minjinam dvdv sum minji dudw, hv mindu, “jvjvklv ngv! ngo baapu alvbv aadung duku!”

Vbvchingching yilaka. Ahtu Jisu a, aatoka!

<sup>21</sup> Ahtu Jisu gv aya ngv mvnwng\* gvlo dooming gvi laka.

---

\* **22:21** Nyi mvnwng;

**ANWNV GAMLV**  
**Tagin first Bible translation based on TEV (Good News)**  
copyright © 2018 The Word for the World International

Language: (Tagin)

Contributor: The Word for the World International

The New Testament in Tagin  
Published as

**ANWNV GAMLV**

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

---

PDF generated using Haiola and XeLaTeX on 13 Jul 2024 from source files dated 15 Apr 2023

65e96bca-33d6-5dc6-a8ee-da485ecfb7ed